

ROMA COMÍNIMO SAN PABLO ORECABE

La Carta del Apóstol San Pablo a los Romanos

Pablo Rómamo ite Jesumo ñinotino cuete

1 ¹ Cue Páblodicue; Jesucristo ocuífíregamiedicue. Juzíñamui cuena uaiúduano eneno cuena nizede ie jíllona uai jino llóllena. Ua afémie orécacue; Juzíñamui mamécamedicue.

² Afe bie jíllonafue Juzíñamui jaiái ninomo uícodo ñuera Cuegáuaimo, ie uai llórainido jino llotátate. ³ Afe jíllonafue cai Ocuíraíma Jesucristodo úrite. Afémie Juzíñamui Jitó. Iemo jíái afémie cai come izóidimie. Afe Jesucristo jaiái illaíma David méifoidigimamona jocócamie. ⁴ Mei íadí Ñuera Joreño dibénemo afe Cristo uáfodo rínorede Juzíñamui Jitona cótoga, mei dama tñillanomona afémie meine cáatateza. ⁵ Juzíñamui Jesucristodo, ñúefuena cuemo itátate. Aferi iere ióbidicue. Afefue cuemo illano, iere cuena canode, ie mámecido oni jíáinomo ie orécamiéna cue íllena. Bie cue ióbillafue ie mámecido oni jíáinomo cue oréllena. Afe cue oréinamona naga náiraíaido aillo Jesumo ñinotino iite. Daje izói ie uaina jíeruitino iite. ⁶ Afémacimona Crístomo ñinotino itímoíza. Ie jira Jesucristo feíena omoí íllena, Juzíñamui eneno omoí nizede.

⁷ Mei jira nana ómoímo cueticue Roma jófuemo itínodiomoi. Juzíñamui izíruigamacidiomoi. Afémiemo omoí ñue jaináíllena eneno uáidogamacidiomoi. Iemo ite caimátaíllafue, naa comeci caimare uái illafue ñiga ómoímo fécaíteza. Nana bífuíai cai Moo Juzíñamui cai Ocuíraíma Jesucristo ñiga, ómoímo mámeíteza.

Pablo Rómamo macácacade

⁸ Nana ómoíri fueñe Jesucristodo “Iere figura,” cai Juzíñamuina daíífíredicue. Ua daíí daídícué mei nágagobíaido ómoímo ite ñuera

finogafuedo úritiaioi. ⁹Jaca nana cue comécido Juzíñamuimo táijidicue, ie Jító ñuera uai jino comínimo llóllena. Nane daje izói Juzíñamuimo comécido cue úriadi, ómoimo uibíoifiredicue. Aferi Juzíñamui cue uai nabáidimie. ¹⁰Bie icoi iruimo ómoimo cue jáillena Juzíñamuimo jicáfiredicue. Ua Juzíñamui comeci jitaia, nibai nibéfodo ñue cuena óreite, ómoimo cue mácajillena. ¹¹Mei ómoina cióacadicue, Crísumo omoi finogafuiai cue cánuamona, ñue riire jaícina omoi íllena. ¹²Ua bie finogafue cuemo íteza ja ómoimo ite. Afe Juzíñamuimo cai finogafuedo conímamo cai úrillamona, conímaiaina comécina caimare náiretaicitai.

¹³Juzíñamuimo finote ámatiai, diga icaiño omoi diné cue jáiacanafue ómoina cue cióllena, ómoimo fidítaacadícue; mei íadi nai jaca jáinidicue. Omoi diné jáiacadicue ómoimona jáíamacina Jesumo jáináitallena. Ua jeede ria llízie jofo ua izói, afe izói Jesús uaimo finotinona itátaacadícue. Oni jáíagobaiimona dáarie cue itata izói, daje izói, ómoimona itátacadícue. ¹⁴Mei cue naga cómemo ñúefuena cue llóllena iere jitáirede. Ua iere baitádinomo llóredicue; daje izói abina onóñedinomo daa fiéñeno llóredicue. ¹⁵Iemona afe izói cue dibénedo nana afe jíllloilliuai ómoimo jino ñue lluáibiacadicue, jica Rómamo itífomoi íadi.

Ñúefue riírede

¹⁶Bie ñúefue uai jino cue llólleri méairuineíticue, mei aféuaimo ite Juzíñamui ríino nana áfemo finotino jíllloillena. Nano fueñe judúuaina jíllotaite, ie mei daje izói judúuaiñedinona jíllotaite. ¹⁷Bie jíllonauai Juzíñamui anamo ñue jaícina cai íllena caina fidítate. Dama Jesumo cai finogafuiaido Juzíñamui anamo ñue jaícina ítiticai. (Abi diné jáíiena íñede.) Jaiai Cuegáuai daí daide: “Finogafuedo Juzíñamui anamo ñue jaícina itímie, zíñona cáate.”

Nana énie nairai íaioi fiénidifuiiai ícoinia ite

¹⁸Mei monámona bite Juzíñamui iere izire duere fínuaufue nana fiénidínomo, naa comécina jaícinaíñedinomo jaiai zúillana, ja birui fidídicaí. Dani íaioimo ite íaifuedo ua ráfuena ónuana rairuíaiaioi. Daje izói afémaci jáíamacina ua ráfuena onóllena jerudíaiioi. ¹⁹Cai onoiga Juzíñamui dibénemo itífuena daje izói ñue onódiaioi; mei dama afémie íemo itífuena nana caimo ciótateza. ²⁰Juzíñamuimo ite ie ciónena raa, ie finócafuiiaido caimo ónorede. Jaca énie fínuaruimona afémie nahí Juzíñamui nana uáfodo ónorede. Daje izói afémie jaca ríinoredeza uáfodo ónorede. Bífuiaina comini náfueñediaioi; íemona dani íaioi ícoinia daí ite. ²¹Mei Juzíñamuina onódiaioi íadi, íemo nitárede ñúefuiaina íemo nitáñediaioi. Daje izói íena “Figora” daíífinidiaioi. Mei jáíifodo ráííñede raamo comécidiaioi. Íaioi abina onótatañede comeci jíítifomo

fiébicaide. ²² “Nimáirainidicai” daiífirediaioi íadi, abina onóñedinona jáidiaioi. ²³ Ziiño Juzíñamuimo ite ebíredifuenta ziiñoñede come jánaraina méidotiaioi. Afe baimo figõñede jánaraina finódiaioi. Féedinuia jánaraina finódiaioi. Jaizai jánaraina finódiaioi. Táicaide rille jánaraina finoda jeire otíaioi.

²⁴ Ie jira Juzíñamui íaioimo ite fieni comeci óiacanafuemo íaioina zóofete. Daií afémaci dani jofo conímamo méaifuiái finódiaioi.

²⁵ Juzíñamuimo ite ua ráfuenta íinoñeno táinofuiaí jeire otíaioi. Afe emódomo ie finoca raamo ñúefue nitádiaioi, mei íadi fueñe afe finode Juzíñamuimo ñúefue nitáñediaioi. Daje izói ie finoca raamo caimare ánozioidiaioi, mei íadi nahí Juzíñamuimo cáimadoñediaioi. Bie Juzíñamuina jaca ninomo cáimadoaredicai. Daií íteza.

²⁶ Mei jira Juzíñamui jíáie meáire comeci óiacanafuemo íaioina zóofete. Ringóniai daa íaioi ini diga íllana féitatiaioi; féitano aillo méaifuiái jíáinori otímaci. Juzíñamui ringóniai jóonia izói íacañeno afe jóoniafuenta uáitatiaioi. ²⁷ Daje izói íññiai daa ringo diga ñue íllana féitatiaioi. Féitano fieni illáfuedo íaioi abi bóobicaide, conímaiaimo fieni finóllena. Afe íññiai conímamo méaifuiái finódiaioi, íemona dani afémaci abímona comuídifueri duere zefuídiaioi. Bie izói Juzíñamui íaioina duere finótate, dani íaioi comeci ífue jaícina jóiñena ícoínia.

²⁸ Ja mei Juzíñamuina onóacañediaioi, jira íaioi comeci jaícina jóiñenafuemo Juzíñamui zóofegaiaioi, Juzíñamui rairuífauiaí finódimaci íaioi íllena. ²⁹ Afémaci naga íaifuiáimo itíaioi; comeci jaícinaíñenafuemo itíaioi. Daje izói jírúrenafuemo itíaioi; fieni jítainafuiáimo itíaioi; naga ráaniaina óiacanafuemo naa fiénidifuiái diga itíaioi. Daje izói afémaci úradorifiredino; come titáfiredino. Fuiríllafuedo úritiaioi. Jífuemarifirediaioi; ñúeodo jáíñedino. Táinona conímamo fieni úrifiredino. ³⁰ Afémaci jíáima jánana fieni úritiaioi. Juzíñamuina éoidiaioi. Daje izói ríimacimo náfueñediaioi. Táinofuiáimo coméciidino. Daje izói fieni abi ínotino. Fiénidifuiáimo comeci facada finófirediaioi. Íaioi úruiaí móotiai ocuífauena jeire oñediaioi. ³¹ Afémaci abina onóacañediaioi. Íaioi daina izói finófinidiaioi. Buna duéruíñediaioi. Caimare uáiduano iba óñellena onóñediaioi. Daje izói afémaci jíáimamo dúecaíñediaioi. ³² Juzíñamui ocuíllana ñue onódiaioi, íadi óiacañediaioi. Afe nana bie fiénidifuiáimo itino jaca ziiñona duere finólliaioiza, áfena jíái onódiaioi. Onódiaioi íadi aféfuiaina féitañeno nai uícadiaioi. Nane bie emódomo jíáimaci afe fiénidifuiái fínua llezica, íaioina: “Caimare bie izói cai illi,” daidíaioi.

Juzíñamui nahí uafue daina izói comínimo riire jicánote

2 ¹ Jáima fieni illafue riire o jicánollena íñede. Naga come “Cue nífuenidicue” daiíndiaioi. Nana omoi dáafuemo itfomoi. Mei

jiáimamo ite fieni illafue riire o jicánua llezica, dama o abi duere finótaitio. Aféfuena riire jicánotio íadi, o jiái dáafuiaimo itio. ²Mei jii, bífuiaimo itino Juzíñamui duere finótaja llezica, afémie nahí uafue daina izói riire jicánoteza, áfena onódicaí. ³Mei o, jiáima fieni illafue riire o jicánua llezica, o jiái daje izói dáafuiaimo itio. Daií o illa llezica “Juzíñamui ie duere finóllifuemona nibai cuena jílloite,” ¿daidío? ¡Jílloñeítio! ⁴¿Juzíñamui omo zíñona fuiñede dúecaillafuena jámairuitio, naa omo ie járitañenafue diga? Afe bie Juzíñamui omo dúecaillafuedo, afémie o comeci ífuena ñúefue dibénemo méidotaacadeza, ¿afe jaca o comécimo úibicaiñedeza, ero ua? ⁵Mei o, comécina iere ríredioza. O comeci ífuena méidoacañedio. Iemona o duere finóllifuiaina aillo ofítaoicaidio. Ua Juzíñamui cócaizaibilliruimo o jaícina jóoide duere finuafue jino omo llóite. ⁶Aféruído naga come dani íaioi finócafuiái izói, íaioimo íbátaite. ⁷Aféruído ebíredifue jenódinomo, zíñona cáataitino íaioimo iite. Daje llezica, nana Juzíñamui íaioimo ñúefue nitállena jenódinomo, naa zíñona illa raa jenódino diga, Juzíñamui zíñona cáataitino íaioimo fécaite. Aféfuiaína jenódiaioi, mei nágarui féitañeno ñúefue dibénemo ífirediaioi. ⁸Mei íadi aféruillaído nana fieni abi finotinona, Juzíñamui duere fínoite. Daje izói nana ua ráfuena jeire óiacañedinona Juzíñamui ie rífuedo duere fínoite, fiénidifuiái jeire íaioi ua jira. ⁹Nana fieni mácafiredinomo aillo duere zefuúllifue iite, naa jamánomo íaioi comeci zúunaillifue diga. Nano fueñe daií judúuaimo iite; ie mei jiái daje izói judúuaiñedinomo cómuite. ¹⁰Mei jiáífodo ñúefuiái finódinomo, Juzíñamui femo ite ebírenafue íaioimo iite, naa comeci caimare uái illafue diga. Daje llezica Juzíñamui íaioimo ñúefue nítaite. Nano fueñe daií judúuaimo iite, ie mei jiái daje izói judúuaiñedinomo cómuite.

¹¹Comínimona dámie jiáie come baimo Juzíñamui gáigamie iñede. ¹²Nana fieni itino Moisés ocuífafuena nai onóñena llezica, ico nine táinocaitiaioi, aféfuena nai onóñenano. Daje izói nana jiáie fieni itino Moisés ocuífafuena onódiaioi íadi, afe daje bie ocuífafuedo riire jicánolliaioi. ¹³Mei ocuífafuena táinona cacádino Juzíñamui anamo ñue jaícina iñediaioi, mei íadi ocuífafuena jeire otino Juzíñamui anamo ñue jaícina itíaioi. ¹⁴Dáarie ocuífafuena onóñede judúuaiñedinomo afe ocuilla daina izói dani íaioi comécido jeire otíaioi. Iemona afémaci dani abi lletádinona itíaioi. ¹⁵Mei jii, íaioi ñue mácafuedo íaioi comécimo ocuica uai cúeinana ácatafirediaioi. Afe llezica íaioi comeci úrilla uai ñue íaioi uaina nabaide. Daje llezica íaioi ifoci úrillafue fiénidifue íaioi finóadi, áfena íaioimo llóite. Fiénidifue nai íaioi finóñenia, ¹⁶Juzíñamui comínimo riire jicánolliruimo íaioi ifoci úrillafue íaioina ráiruute. Aféruillaído naga comini báinino finoca raana Jesucristodo Juzíñamui riire jicánoite, cue lloga jílloilliuai daina izói.

Judúuai Moisés ocuícafuemo figo náfueñediaioi

¹⁷Mei ja birui, “Judío ímiedicue” daidio. O jíllloillena, Moisés ocuícafuemo ínotio; o Juzíñamui dibénemo fieni abina ínotio. ¹⁸Juzíñamui comeci jitáinafue onódio; afe ocuícafue omo llote: “Nana o nícidogafuemo ñuera diga o nizeri”. ¹⁹“Uínidino izóidino ifóllena, ñue uáfueña onódicue,” daidio. “Daje izói jítifodo macádinona ñue egáíñollena onódicue,” daidio. ²⁰“Abina onóñedinona llófueredicue,” daidio. Daje izói, “Urue izóidinona jaícina llófueredicue,” daidio. “Ua nahí ráfueña onótate uai afe cai ocuícafuemo ite,” daíífredio. Afe izói, “Nana ifócido onóigafue caimo ite,” daidio. ²¹Mei jíáimana llófuetio íadi, ¿nibái mei dama o abina lletáñedio? Omoi meríriñeno iri daíicadio íadi, ¿nibái mei merírifredio? ²²Omoi jiruíreñeno iri, dama daíicadio íadi, ¿nibái mei jiruiredio? Jánaraiaína éoidio íadi, ¿nibái mei íaioi illácomo ite ráifide ráaniai o mériano ráaredimiena jáidío? ²³Ocuilla uai dibéfodo iere abi ínotio; mei íadi Juzíñamuina jámairuitio, afe daje ocuícafuena jeire o oñena ícoínia. ²⁴Meita Cuegáuai ñue daide: “Judúuaiñedino omoi ícoínia Juzíñamuina fieni úritiaioi.”

²⁵Moisés ocuícafue jeire o oíadi omoi finófirena bacano icoi quétafue uáfueña omo ráifite. Mei íadi afe uai figo o íñoñeniadi, jaca quétañegamie izói íitio. ²⁶Mei jíáifodo, daa bacano icoi quétañegamie ocuícafue daína izói jeire oíadi, afémie bacano icoi quetácamié izói facádoga, quétañega íadi. ²⁷Afe bacano icoi quétañegamie, mei íadi ocuícafue jeire otímie, ona riire jicánoite, bacano icoi quetácamiéna o íadi, daje izói cuega ocuícafue omo ite íadi, mei áfena jeire oñedioza. ²⁸Judíona jáillena dama jinófenemo cóide ráaiñede. Daje izói bacano icoi quetácamiéna jáillena fia abimo cóide ráaiñede. ²⁹Mei íadi nahí ráfuiái jíáifodo jóide. Nahí jáidimie ie comécimo áfena jaide. Daje izói nahí bacano icoi quétafue comécimo dúide. Cuega ocuilla uaimo jaináñede; mei íadi come joréñodo ie comécimo ite. Bie izói itímie comínimona jíeruñegaza, mei íadi Juzíñamui jíeruiga.

3 ¹Judío ímiena cue íllemona ¿mínica mei baímo óíticue? ¿Bacan quétafue mei nibénemo ráifide? ²Judío ímiena cue íllamona áillofuiái ícoínia ñue ííticue. Daje izói quétafuemo aillo ráifinafue ite. Nano fueñe Juzíñamui ie comeci úrilla uai Judúuaimo orede. ³Íaioimona dáarie íaioi ínogafuena féitatiaioi. Féitatiaioi íadi, Juzíñamui lloga uai jáanonide, mei afe Juzíñamui jaca féitafinidimie. ⁴Ie íaioi féitaja íena nie izói nibáñede. Mei jíáifodo íteza: nana comíni taino llófiredino ille llezica, Juzíñamui nana ie jetáacaigafuena nai uáfueña jaícina finode. Daíí Cuegáuai úrite:

O daína uáillaimona jaícinaidimiena o íllana ónoítiaioi.

Riire o jicánua mei, comíni ñue ínogamiéna íitio.

⁵Mei caimo ite fiénidifuedo Juzíñamui jaícinaidimie illáfuena jino uáfomo cíotaiadi ¿nie izói dáiticaí? ¿Mei Juzíñamui cai duere finóllena jaícinaidimie? (Jamai come úrilla izói úriticue.) ⁶Mei feñedeza. Mei Juzíñamui comécina jaícina iñeniadi, ¿nie izói nana énie comini riire jicánoite? Afémie jaca ninomo comécina jaícina jóidimienamona, nana náiraina riire jicánorede.

⁷Mei cue táinofuiaido Juzíñamui uafue nai jamánomo cue ebíruiaí, ¿nibái mei fiénidimiedicue izói Juzíñamui riire cuemo jicánote? ⁸Bie uáfuenia, ñúefue bíllena nibái mei fiénidifueña finóñedicai. Afe bie izóidifue llófuiana dáarie caimo jitádiaíoi. Bifue caimo jitáдино comeci fieni jítainafuedo úritiaíoi. Bie izói itino duere finólliaíoi.

Nana caimo ite fiénidifue ícoinia

⁹¿Mei níifue? ¿Cai bie judíuai jíáie comini baimo ñuera? Mei ua feñede. Ja como fidítaticai judíuai naa jíáie comini diga riírede fiénidifue anamo itáíoi. ¹⁰Jaiái Cuegáuái daí daide:

Buna jaca íaifuenidimiena iñede.

Jaca ninó daa ñúemiena iñede.

¹¹Daje izói jaca ninó ñúefuena onóacadimiena iñede.

Daje izói Juzíñamui daa jenódimiena iñede, ie diga íllena.

¹²Nana Juzíñamuimona onido jáidiaíoi.

Afémaci daní fiénidimacina jáidiaíoi. Buna ninó ñúefue finóñena.

Jaca ninó daa iñede.

¹³Iaíoi úriragoí íbaiñega raíifo izoide, mei iere íáire úritiaíoiza.

Iaíoi fuedo jífuemarifirediaíoi.

Iaíoi fuemo ite úrilla jaio aífoi izoide, mei jíáima jánana iere fieni úritiaíoiza.

¹⁴Afémaci daa faidórafuiaido úritiaíoi, naa

íáirede uáillaído.

¹⁵Come titállena jarire áizicaidiaíoi.

¹⁶Iaíoi fieni illáfuedo aillo jíáimaci táinocaitadiaíoi.

Daje izói comínina zúunaitadiaíoi.

¹⁷Afémaci comeci caimare uái illáfuena onóñediaíoi.

¹⁸Daje izói afémaci Juzíñamui ñue jacírenafuemo due jiza comeci

facáñediaíoi, —daí jaíai Cuegáuái daide.

¹⁹Nana jaíai ocuífue ñaína uaina, afe ocuífue anamo itánomo dúide.

Bífuena ñue onódicaiza. Daí Juzíñamui mamérite, nana comini úrillana lláicaitallena; daje izói naga naírai Juzíñamui riire jicánollifue anamo íaíoi itábicaillena. ²⁰Ocuica uai jeire cai úado, buna Juzíñamui anamo ñue jaícina iñeite. Ocuífue caína jíllotañeite; daa caimo ite fiénidifuiaina caína onótate.

Jíllloillifue cai íinogafuedo comuide

²¹Mei birui, jácara ocuífue oni eneno fíiano, Juzíñamui anamo ñue jaícina cai íllena afémie cómfuena caimo onótate. Bie cómfuena uai

lloraini cuegánico facádoiadi ónorede. Daje izói ocuilla uai cúeinanicomona jíái ónorede. ²² Juzíñamui anamo ñue jaícina cai illifue bífuedo ite. Dama Jesucrístomo cai ínuado bie izói ííticai. Nana ie uaimo ínotinona afémie daje izói fñoite; dáamie jíáimie baimo gáíñeno nana dájerize jaícina jóneite. ²³ Mei naga come fiénidifuiarede; jíllotaite Juzíñamuimona nana jica itáiaoi. ²⁴ Mei íadi Juzíñamui caimo dúecaillanona, fia íbatañeno ie anamo ñue jaícina caina itátate. Mei dama ie jíto Jesucrístodo caina jíllotate. ²⁵ Cai finoca fiénidifue íbana Juzíñamui Jesucristo tíllamo dane ote. Iemona íaifuenta dogá izói iticaí. Bie múíñuafue cai ínogafuedo caimo dúciite. Bifue daíí íficaide Juzíñamuina jaícinaidímie daííllena. Mei jiaí finoca fiénidifuiái íbana raire otátañede; afémie comécina járidoñedímie. ²⁶ Daje izói daíí íficaide birui Juzíñamui jaícinaidímie daííllena. Nana Jesumo ínotinona Juzíñamui nai birui afémie anamo ñue jaícina itátate. Iemona Juzíñamui nai jaícinaidímiena íocaite.

²⁷ Ie mei ¿come abí ínuafue mei nie izói ite? Afe abí ínuafue oni eneno fiébicaite. Ocuícafuiaí jeire íaioi úado nai fienu abí ínuafuemo itáiaoi. Mei íadi Jesucrístomo ínogafuemo fienu abí ínollifuenta íñede. ²⁸ Nana cai ílogáfuiamona bifue jino llúana ñue baite. Dama Jesumo ínotimie Juzíñamui anamo ñue jaícina írena. Ocuica uailaí afémie jeire ua oni jíáífodo joide. Afena Juzíñamui náfuñede, dama íemo ínuana náfuete.

²⁹ ¿Meita Juzíñamui dama judúuai íena? Ieñede. Daje izói afe Juzíñamui judúuaiñedíno ie. ³⁰ Mei jíi Juzíñamui damade. Afémie baimo jíáiena íñede. Afémie nana íemo ínotinona ie anamo ñue jaícina itátate. Afémaci bacano ícoi íaioi quétajana náfuñede. Daje izói quetáñenana náfuñede. ³¹ Ie mei níbai dámie jícanoite. ¿Meita cai ínogafuedo ocuilla uaina uáitaiticaí? Ieñedeza; úaitañeíticaí. Mei jíáífodo Jesuna cai ínuado afe ocuilla uaina uáfuenta jíeruiticaí.

Abraham Juzíñamuimo ínuá izói cai ínollena cai onótate

4 ¹ Mei áfemona cai jaiáidígima Abraham díbénemo jíáífue jícanoíticaí. ¿Afe Abraham mei nie ñúefue ote? Daína uai jeire ie ófírenamona abí díne nífuena oñede. ² Mei Abraham ie finócafuiáido Juzíñamui anamo ñue jaícina ie itábicaíadi, afémie abí ínorede. Mei íadi Juzíñamui uícori afémie abí ínonide. Ie finócafuiáido Juzíñamui anamo ñue jaícina itátañega. ³ Mei jíáífodo Cuegáuai daína izói, “Abraham Juzíñamuimo ínote.” Iemona Juzíñamuimo ie ínuado Juzíñamui íena “Íaífuenidímiedio” daide. ⁴ Da come tájjiadi, afe tájjina íba fia íemo dúecaillano íñega; afe tájjitatímie íena íbárede. Mei íadi cai jíllloillifue cai tájjicanado íba llíñua izói llínonide. ⁵ Mei jíáífodo, dámie jíllona tájjina finóñeno, ie jíllloillena dama Juzíñamuimo ínorede; mei Juzíñamui íemo ínote íaífuiáredímiena llínofiredeza. Mei íemo Juzíñamuimo ie ínuado, Juzíñamui íena: “Íaífuenidímiedio,” dáíite.

⁶Dama David come cáimafuiaido úrite. Dámie ie uícodo finócafuiaina Juzíñamui náfueñede. Ua náfueñede, mei íadi íemo ie ínuado Juzíñamui íafuiainide dainámiena afe ínotimie jaide. Afe daiítadimie iere caimare ite. ⁷David daináuai daide:

Iaioimo ite fiénidifuiaina Juzíñamui dogánona iere ióbidiaioi.

Daje izói íafuiaina oni féitagamiiai iere ióbidiaioi.

⁸Daje izói íaioimo ite fiénidifuenta náfueñegano iere caimare itíaiói.

⁹¿Meita bie cáimafuiái dama bacano ícoi quetaca judúuaimo duide? Ieñedeza; nana comini éna mameide. Jira bacano ícoi quetañega judúuainédimacimo daje izói afe cáimafue íaioimo duide. Jae llotícuza Abraham Juzíñamuimo ínuado Juzíñamui éna: “Íafuiainidimiedio,” daide. ¹⁰Mei íadi íníruido daí éna daina? ¿Bacano ícoi quetaa mei daí daina? ¿Nibai quetañenia daí daina? Jii, uáfueza, nai quetañena llezica daí éna daina. ¹¹Afe: “Íafuenidimiedio,” daina méifodo, Abraham bacano ícoi quetafuenta Juzíñamui ocuide. Bie quetaínafue onóillena jóonega raa izoide, Juzíñamui ja bímie ie ínuafuedo íafuenidimie daíllena. Daí Abraham nai quetañena llezica Juzíñamuimo ie ínuamona, nana judúuainéde ínotino moona jaide. Iemona Juzíñamui daje izói nana afémacina: “Íafuenidiomoi,” daide. ¹²Uáfueza. Abraham nana afémie dama ie ínuua izói ínote quetácano moo. Mei nanoide cai moo Abraham ie bacano ícoi nai quetañega ia, ñue Juzíñamuimo ínoteza.

Juzíñamui jica ia raire llogáuai comini ínuamona ñue ícoimo fuitaca

¹³Mei jii, Juzíñamui Abrahana ñuera jica ia raire fidítauai daide. Aféuai llote: “O nana o erófene igímaiairi nana éniena máíñoitiomoi.” Abraham Juzíñamuimo jaiai uícodo ínuua jira, Juzíñamui búuai íemo llote. Fia ocuilla uai ie jeire úado Juzíñamui daí éna daíñede. Ua, dama Juzíñamuimo ie ínuado Juzíñamui éna: “Íafuenidimiedio,” daide. ¹⁴Mei daní ocuilla uai jeire otino núefuena íaioi maiñóadi, íemona ínogafue comínimo figo jínoñede. Daje llezica Juzíñamui jica ia raire llogáuai ráífinano niné feide. Mei íadi daiítañedeza jíáifodo joide. Juzíñamuimo cai ínuafuedo ie caimo lloga núefuena maiñóredicai. ¹⁵Ocuilla uai llóina méifodo aféuai jeire onédino duere finótalliaioi. Mei íadi ocuilla uai nai lloñena llezica, aféuai náfuenide.

¹⁶Afe Juzíñamui Abrahamo jica ia raire llogáuai, Juzíñamui ñue riire mamede, nana ie erófene igímaiai afe núefue jeire íaioi óllena. Mei jira, afe Juzíñamui lloga núefue, fia fecaca raa izói comini Juzíñamuimo ínuado íaioimo írede, mei áfena íaioi ñéfina cígimona ónidiaioiza. Bifue daíacade, Juzíñamui uícodo raire llogáuai daa ocuilla uai jeire otino íeñedeza, mei íadi nana Abraham ínuua izói ínotino ie. ¹⁷Iemona Abraham Juzíñamui eróicana nana cai moona jaide. Abraham afe

Juzíñamuimo ñue ñnote. Jaiái Cuegáuaido Juzíñamui Abrahana daií daide: “Aillo náiraiái moona ona jónetice.” Afémie daií daiírede, mei Juzíñamui tíidinona meine abido caátaitaredeza. Daje izói ñede ráaniaina Juzíñamui itátarede.

¹⁸ Aféfuiaimo Abraham fáicanocaiñeno ñinoide. Ua comini daina izói Abraham jamánomo jónaiteza, ja úruenide. Abraham daií úruereillinona úiñonina llezica nai Juzíñamuimo ñnuano úiñoide. Afe daií Juzíñamui éna daina izói, Abraham “aillo náiraiái moona” jaide. Juzíñamui bie izói éna daide: “O úcoide erófene igímaiaí aillo jébutiaioí,” daide. ¹⁹ Abraham cien fimónamo ánozide íadi, ie ñnogafue jaca féñede. Afémie jónailla izói ie ai jónaillana onode. Ua afengo iere jónaillamona tíacade. Jae úruena comútanide. ²⁰ Mei íadi afe llezica Abraham jizíñeno Juzíñamuimo ñnofirede. Juzíñamui jica ia raire llogáuaina ruiffruiñeno nai émo ñnoicaide. Mei jíáfodo Abraham áfena féitañeno iere izire ñnote. Jaca comeci rairuíñeno Juzíñamuimo úrioicaide. Juzíñamuimo ióbioicana úrite. ²¹ Afémie daide:

—Nana jaiái Juzíñamui jica ia raire cuemo lloga rafue Juzíñamui uáfueña cuemo zúitaite, —d-aide. ²² Iemona, émo ie ñnuado Juzíñamui éna daide: “Íaifuenidimiedio,” daide.

²³ Bie Juzíñamui Abrahana daina “Cuemo o ñnuado jae íaifuenidimiedio” daa Abrahamo cúeñegaza, ²⁴ mei íadi nana caimo cuega cai ñnollena. Mei jira tíllanomona cai Ocuíraima Jesús caátate Juzíñamuimo birui ñnoticaí. Iemo cai ñnuado caina: “Íaifuenidinodiomoi,” dáite. ²⁵ Afe Jesús caimo ite fiénidifue ícoínia duere finótagamiena jaide. Afe mei Juzíñamui anamo ñue jaícina nífuenino cai íllena afémie caátaga.

Juzíñamui “Nífuenidimiedio” daina méifomo ñue cai illifue

5 ¹ Mei afe jira, dácaíño Juzíñamui anamo ñue jaícina nífuenino cai illa mei, meine abido Juzíñamuina jáciruiñeiticaí. Afe comeci caimare uái illafue cai Ocuíraima Jesucristo ie tíllado cáiena ote. ² Mei jíi, cai ñnuado bie afémie cai cánuafue díbenemo jónegacai. Aferi izire jaináidicaí. Iemona ióbifiredicaí, mei Juzíñamuimo ite ebíredemona cáiena oni máíñoiticaíza. Afemo ocuíticaí. ³ Daa bie cai ocuírillamo íobiñeiticaí, mei daje izói duere cai zefuíllifue mo ióbíticaí. Mei onódicaíza duere cai zefuíllifue cai comeci járitañenafue caimo comuide. ⁴ Iemo afe comeci fígomie dáinana caina jáitate. Iemo fígomie dáinana mei Juzíñamui cáimafue mo úiñoifireiticaí. ⁵ Iemo bie úiñoínafue caina zúucaitañeite, mei Juzíñamui caina ie izíruillafue ñue caimo llóteza. Bie caina ie izíruillafueña ie oreca Ñuera Joréñodo onódicaí.

⁶ Dani cai ñéfiná cígimona jíllonidicaí. Daií cai illa llezica, Juzíñamui jica ia mamécaruimo, Jesucristo nana fiénidino ífomo tíizaíbite.

7Bíniemo comécina jaícina jóidimie tílla ifomo tíitimiena iñede. Mei nibai jamánomo fígomie ifomo, daa tírede. ⁸Mei jíáfodo cai fieni illa llezica, Cristo cai ifomo cai jíllloillena tízaibite. Afedo Juzíñamui caina ie izíruillafue caimo ciotate. ⁹Iemona ja birui Cristo tíllamona Juzíñamui anamo ñue jaícina itícaiza, ie jira úirairuimo ite duere fínuafuemona, Cristo cai rairuúllado, jamánomo oni eneno íredicai. ¹⁰Nai afémie bacáuai imácina cai illa llezica, ie Jitó cai ícoinia tíide. Daií ie tíllamona, Moo Juzíñamui comécina jácruitañegacai. Ja birui cai comeci íena jacíruiñenamona, birui ie cáanado jamánomo ñue jílloredicai. (Ua caade Cristo Juzíñamui uícomo caido úrite. Afe daií ie úrioinado, ico bite duere cai finóllifuemona jíllloiticaí). ¹¹Daa bífueñedeza, nane bie emódomo cai Ocuíraíma Jesucrístodo Juzíñamuimo íobioiticaí, mei afe Crístodo Juzíñamuina cai jacíruiñenafuena otícaiza.

**Nanoide Adán caimo comuítagafuemona Juzíñamui
caina éoicaide; mei jíáfodo Cristo caimo comuítagafuedo
Juzíñamui caimare caido eróicaide**

¹²Mei onóigaza, dáamiemona fiénidífue nana comínido jaide. Ie mei afe fiénidífuemona tíllafue daje izóí naga cómemo comuide, mei naga come fiénidífuaíredez. ¹³Moisés ocuilla uai nai iñena llezica, fiénidífue jaca comínido ite. Mei íadí ocuilla uai nai iñena llezica, afe fiénidífue comínimo nitañega. ¹⁴Mei íadí jaiái Adán illálgimamona Moisés illálgimamo fiénidífuaí finódino tícoizífirediaíoi, mei titade ríino anamo itíaiioiza. Juzíñamui jóonega íaiíoi comeci ñue úrilla uaimo náfueñediaíoi. Daií náfueñenamona íaiíoi fiénidífue comuide. Mei jíáfodo Adán fiénidífue Juzíñamui uáfodo lloga rairuica uai jeire ie oñenamona comuide. Mei íadí bie Moisés uícodo itino fiénidífue jíáínodo comuide. Adán finoca fiénidífue izóí comuíñede. Afe Adán uire biite Cristo jana.

¹⁵Adán náfueñegafue Juzíñamui caimo fia iga cáimafue izóíñede. Mei dama Adán náfueñegafuedo nana comini tímáritiaíoi. Mei íadí Juzíñamui raiñóñeno caimo fecaca jíllonafue jamánomo baimo ñuera. Dama Jesucrístodo aillo comini canócaiaíoi. ¹⁶Dáamiede finoca fiénidífue jaca Juzíñamui caimo fecaca jíllonafue izóíñede. Mei afe daade Adán náfueñegafuemona cai duere finóbillífue zúide, mei jíáfodo Juzíñamuimona caimo lloga jíllonafuedo, Juzíñamui raiñóñeno aillo comínina ie dibénemo ñue jaícina itábicaítate, aillo íaiíoi náfueñegafuaí íaiíoimo ite íadí. ¹⁷Mei jíí, daa come náfueñenamona titáfírede ríino anamo nana comini are ninomo itíaiíoi. Mei jíáfodo dáamiede Jesucrístodo nana Juzíñamui anamo raiñóñeno ñue jaícina jóonegano, jamánomo baimo ñuera zíñona íaiíoi ille ríino óitiaíoi.

¹⁸Mei dáii Adana náfueñegafuemona duere finóbillafue nana comínimo comuide. Daje izóí Jesucrístodo nífuenide comécimona

tízaibillafuemoná, duere finóbiñenafue nana comínimo zuide. Daje llezica zíiñona cai illifue caimo comuide. ¹⁹Bie daide: dáamiede jeire ónegafuemoná nana comini fiénidifuiairedinona jáidiaioi. Mei íadi dáamiede Jesucristo jeire ogáfuemoná aillo comini Juzíñamui anamo nífuenedinona ñue jóonegaiaioi. ²⁰Mei jaiái Juzíñamui cai ocuilla uai caimo lloga, caimo ite fiénidifue jino uáfodo cai onóillena. Ua, ocuilla uai llua mei caimo ite fiénidifuiái aillo jebuide. Mei íadi daje llezica Juzíñamui caimo dúecaillafuiái daje izói afe fiénidifuiái baímo aillo jamánomo jebuide. ²¹Iemoná, fiénidifue caimo íllamona afe rírede fiénidifue caina titárede. Daje izói Juzíñamui caimo izire dúecaillano, Juzíñamui anamo nífuenedino ñue jaícina cai illa llezica, cai Ocuíraíma Jesucristodo, afémie caina zíiñona cáatarede.

Comini fiénidifuiáimo íllamona tíidino izóidiaioi, mei íadi daje llezica afémaci Crístomo ínuamona cáadiaioi

6 ¹Nana bie caimo llógamona ¿nie izói dáiticaí? ¿Mei níbai fiénidifue finócana uiticaí, Juzíñamui jamánomo caimo ie dúecaillafue caimo ácatallena? ²¡Mei íeñedeza! Cai bie ja fiénidifue dibénemo tíidnodicaíza ¿mei nie izói, fiénidifue mo nai íoicaíticaí? ³¿Nai bífuena onóñediomoi? Nana cai ie báutizaillaruimona Jesucristomo uáfueña jainaina llezica, dáaruído afe Cristo tílla dibénemo jaináitagacaí. ⁴Mei jíi, cai báutizaillaruimona Cristo díga dáafomo raigacaí izóidicaí. Iemoná aféruimo tíidinona maméidicaí. Ua tíidinona mamécacaí, áfemona Cristo ie tíillanomona meine abido cáadimiéna jailla izói, birui cáadena cai jáillena. Daíí cai jaillano cómofue mo íocairedicaí. Mei jíi, Cristo ie Moomo ite jamánomo ñuera ríinodo meine cáadimiéna jáitaga, íemo daje izói afe daje ríinodo cómofue mo íocairedicaí.

⁵Uáfueña dáiticaí, Cristo tílla izói tíidinona jae mamécacaí. Iemoná daje izói ie meine abido cáadimiéna jailla izói, dani cai tíillanomona meine cáataga izói cómofuiáimo íredicaí. ⁶Cristo cruzmo coraíca llezica nauí fueñe cai illafue dáanomó titácaza onódicaí. Uafue, afefue titaca, nanómóna cai comécimo ite fiéni gáinano caina anáfenoñeíllena. Iemoná fiénidifue dibénemo rairuícánona íñeíticaí. Daje izói riire tájijitatimiémo jainaina izói, fiénidifue mo jáinaiñeíticaí. ⁷Mei jíi, Cristo díga tíidimie ja íaífuemoná oni jírecaíde. ⁸Iemoná dácaíño Cristo tílla izói dáanomó afémie díga, cai comeci fiéni óiacanafue tíide izói féitaga. Nauí daíí ie díga cai tíillamóna, daje izói biruíllaido afémie díga cai íllana ua onódicaí. ⁹Mei onódicaíza, Cristo dácaíño tíillanomóna meine abido cáadimiéna jaíde. Daíí meine jaillano ja meine abido dánomo tííñeíte. Afémie ja ménacaíño tíinide. ¹⁰Mei Cristo ie tíillaruímo, fiénidifue dibénedo dácaíño tíide, jaca nínomó nane tííñeíllena. Mei íadi afémie meine cáadena jaillano ie cáanano Juzíñamuímo duíde. ¹¹Daje izói, mai

fiénidifue dibénemo tíidino izói omoi iri. Mei jiáifodo Juzíñamui íena cáadinona mai omoi iri. Afemo izire comécimo mai omoi facáoiri, mei cai Ocuíraima Jesucrístomo dájena jaináidiomoiza.

¹² Ie jira fiénidifuenta omoi abina náamatatañeno iri; afefue omoi zíñona iñena abí ana úillemona abí omoi rairuiri. Mei Taife comútaga caimo ite íaifue cai abí fiéni jítainafue jino déillena ocuíoideza. Afemona izire abí omoi rairuiri. ¹³ Dani omoi abina fiénidifuenta finótañeno iri. Mei jiáifodo dani omoi abina Juzíñamuimo omoi jaináitari; ua, tíllanomona meine cáadena jaide izóidino afémiemo omoi abí jaináitari. Ie jira nana omoi abina Juzíñamui ñúefue finóllena, omoi jaináitari. ¹⁴ Ja benómona fiénidifue ómoína ana úiñeite. Mei ocuilla uai anamo ja íñedicaiza; mei jiáifodo Juzíñamui cairi dúecaillafuemo itícaiza.

Comini jacire riire rairuúllaruimona daa ráfuenta caina onótate

¹⁵ Ie mei ¿nie izói íiticaí? Mei ocuilla uai anamo íñedicaiza mei jiáifodo Juzíñamui cairi dúecaillafuemo itícaiza; íemona ¿meita fiénidifue finóredicaí? Ieñedeza, finónidicaí. ¹⁶ Ñue onódiomoiza, ómoimona nágamiiai riire ocuídillaímamo fecaca llezica, aféllaíma ocuúllana ñue jeire órediomoí. Daje llezica aféllaímamo izire jaináidiomoí. Bie izói caimo ite fiénidifuiái, jacire ocuídillaíma ana uilla izói, nana caina ana uite. Afemona tíllafue naga cómemo comuide. Mei íadi Jesumo cai ínuua llezica jiáie cai ocuídillaíma Juzíñamuimo dúidicaí, comécina jaícina ñue jóidimacina nágarui cai íllena. ¹⁷ Mei íadi ómoiri Juzíñamuína: “Tere figura,” daidicue. Mei nauí fiénidifuemo izire rairuúcanona omoi illa llezica, ómoímo lloga llófueinafuenta ja ñue jeire otfomoiza. ¹⁸ Afe fiénidifuemona oni omoi jírecailla mei, jiáie ocuíraíma Juzíñamui rairuúcanona jáidiomoí. Iemona comécina jaícina ñue jóidinona nágarui írediomoí. ¹⁹ (Ua omoi onoiga comini ráfuiáido úriticue, mei omoi ífoci déínenamona bífuiaina ñue cacánidi omoi.) Nauí fiéni illáfuiáimo omoi abina jaináitafirediomoí. Nane afe baimo jiáie jamánomo fiéni abí fínuamo abina finótadiomoí. Nauí daí abina omoi finota izói, mai birui comece jaícínainafuemo abí omoi jaináitari, dama Juzíñamui íena oni eneno ñue mamécanona omoi íllena.

²⁰ Nai fiénidifuiáimo riire rairuúcanona omo illa llezica, comece jaícina jóinafue jaináíñediomoí. ²¹ Nauí omoi illáfuiáina birui meáiruitiomoí. Mei aféfuiaímona ¿nie cánuafuiái otíomoí? Onédiomoiza; tíllafue diné jaca ómoína uite. ²² Mei íadi fiénidifuemona oni eneno omoi jírecaillamona, ja birui Juzíñamui rairuúcanodiomoí. Iemona birui afémiemo ñue jaináidiomoí. Bie izói omoi íllamona, Juzíñamui íbana ñue caimare ómoína cánoite. Ua afémie íeiena ómoína oni eneno ñue fínoite. Iemona afe ícoímo zíñona illáfuenta óitiomoí. ²³ Fiéni cai íllamona daa tíllafue óiticaí. Mei íadi Juzíñamui rainóñeno fia caimo iga raa, cai

zúñona illifue. Bie zúñona cai illifue dama cai Ocuíraima Jesucrístomo dájena cai jaináinamona caimo iga.

Hima áireinamona ringo iníreinamona daa ráfuenta cai onótate

7 ¹Amatai, onódiomoiza, da come dama nai ie tíñeniadi, ocuilla uai nai íemo dúide. ²Ja omoi onóigafue jino llóiticue, áfedo jíáifuenta omoi onóillena. Da inírede ringo, ie ini caana llezica, ocuilla uaido ie inimo cuinaca izói jainaide. Mei ie ini tiilla mei, afe íemo jainátate ocuilla uáimona afengo jae oni jírecaide. ³Afe llezica afengo jíáie ímamo inírena ñuera. Afengo daí iníreilla jiruñeñede. Mei íadi ie ini nai ítemo afengo jíáie iima diga illa afengo iere jiruñede.

⁴Cue ámatiai, birui Jesucristo abimo dájena jaináidicai; ua iníredingo inimo jainaina izói jaináidiomoi. Afe Crístomo omoi jaináinamona, ie tíllado tídinona mamécaomoi. Ie jira ocuilla uai dibénemo tídino izói iticai. Fueñe bie ocuilla uaimo, ringo inimo jainaila izói, jaináidicai. Mei íadi ja birui tídino izói cai íllamona afe ocuilla uaimo jaináíñedicai. Dama tíllanomona meine abido cáadimiena jaide Crístomo jaináidicaiza. Afe bie Crístomo cai jaináinana Juzíñamui caimo comuítate. Ua comuítate caido ie comeci jítaínafue ñue ícoimo cai fuitállena. ⁵Mei nanómona comini comécimo itífue dibénemo cai ífrena llezica, afe ocuilla uai cai abimo ite fieni óiacanafuina cazítate. Aféfuiai caina ana tíllinomo uite. ⁶Mei íadi ja birui afe ocuilla uai dibénemo tídino izóidicai. Fueñ afe ocuilla uai anamo riire iticai, mei íadi ja birui afe uáimona ñue oni jírecaidicai, Ñuera Joreño cómuena méidoga caimo itífuedo Juzíñamui ocuícamacina cai íllena. Jaii cuela ocuilla uaido Juzíñamui ocuícamacina ínidicai.

Cuomo ite íaifue cue caimare illafue llótaidote

⁷Iemona ¿mei nie izói dáíiticaí? ¿Ocuilla uaina fiénidífue daíredicaí? ¡Daíínidicaí! Mei íadi afe ocuilla uaido fiénidífuenta onótagacue. Afe uai nai jino lloñena llezica fiénidífuenta onóñedicue. Ja omoi onóigafue jino llóiticue, áfedo jíáifuenta omoi onóillena. Ocuilla uai nai cuena dáííñeniadi, aino come raana óiacanana onóñedicue. Mei íadi afe daí íllua mei fieni óiacanana onódicue. ⁸Afena cue onónamona, bie ocuilla uai llúado, cue comécimo ite naga fieni jítainana uáfodo cazítaga. Mei ocuilla uai nai cuemo lloñena llezica, fiénidífue tíide izói uái íllano figo onóñedicue. ⁹Naúdíruimo, ocuilla uai cúemona nai oni eneno illa llezica, cue comeci úrilla caimare ite. Mei íadi ocuilla uai ja lluaíbillado fiénidífue meine abido comuide. Afefue meine comuíllamona fállena cue orede. ¹⁰Dinómona bie izói cuemo zúide. Daje cuena ñue zúñona illífuemo úirede uailai, ñue illífuemo cuena uíñede. Mei jíáfodo cue dibénemo, cuena ana tíllanomo uite. ¹¹Mei jíi, fueñe fiénidífue

cuemo iñede daidicue. Mei íadi ocuilla uaina cue fídiamona, cuemo ite fiénidifuiaina onódicue. Afe ícoinia Juzíñamui fáiacagamiena iticue.

¹² Afemona onoiga, afe ocuilla uai iere ñuera. Daje izói lletara uai jamánomo ñuera. Afe uai ñue jaícina jóidiuai. ¹³ ¿Meita bie ñuera ocuilla uai cuena ana tñillinomo úirede? Ñue onógaza, únide. Mei jiáifodo cuemo ite fiénidifuedo ana tñillinomo uigacue. Afemona uáfueña cótogaza, bie fiénidifue ua nahí fiénideza. Afe cuena ana uillafue ñúefuedo finoca. Daí Juzíñamui ocuilla uai, nana fiénidifuiái jamánomo fáire nana caina onótate.

¹⁴ Afe ocuilla uai Juzíñamui Ñuera Joreño dúi difue. Afena onódicaiza. Mei jiáifodo nanómona cue comécimo itifue Ñuera Joreño dúiñede. Mei izire rairuícamié izói íaifue fñuanamo fecácamié izóidicue.

¹⁵ Birui cuemo ífcaidifueña onóñedicue. Ñue cue comeci jítainafueña finóñedicue, mei íadi cue comeci éoillafueña áfena finófiredicue.

¹⁶ Mei cue comeci jítaiñenafue cue finóadi, afe cue finócafue fiéninana onódicue, mei Juzíñamui Ocuilla uai cuena áfemona rairuídeza. Iemona afe bie ocuilla uaina nahí ñuera daidicue.

¹⁷ Mei daí áfena dama finóñedicue, mei jiáifodo cuemo ite íaifue aféfuemona comuide.

¹⁸ Mei onódicueza, dama cuemo ñúefueña iñede. Biedo daíacadicue, nanómona cuemo itifue ñúeñede. Mei jii, cue comeci ñúefue finóacade, mei íadi áfena jaca finónidicue. ¹⁹ Cue jitaiga ñúefueña finóñedicue; mei íadi cue jítaiñega fiénidifuiaina finócadicue. ²⁰ Iemona cue finóacañega fiénidifue cue finóadi, dama cúeñedeza, cuemo ite fiénidifueña comuide.

²¹ Daí jaca bie izói cuemo íoicaide: mei ñúefue cue finóacania, áfena baiñeno dama cuemo ite íaifuiái baífiredicue. ²² Mei jiáifodo cue comécido Juzíñamui ocuilla uaina gáidicue. ²³ Mei íadi afe llezica cue comécimo ite jiáie niné cue úiacade uaina comécido onódicue. Afe uai cue ífoci úrilla ñúefueña niné féitaoide. Afe bie fieni cue rairuíoide uai cue abimo ite. Afe uai cuena llavéoide.

²⁴ ¡Nai iere íoíñedimiedicue! Bie ana tñillamo cue uite abímona, ¿bu oni cue jírecaitalle? ²⁵ Dama Juzíñamui ie Jitó caí Ocuíraíma Jesucristodo bífuemona cuena oni jírecaitarede. Iemona, ja birui Juzíñamuina “Íere figora” daidicue. Iemo cue illafue bie izói ite: Juzíñamui ocuilla uai anamo cue itábicaillena dama Juzíñamui jóonega cue comeci ñue úrillado finóredicue. Mei íadi dama cue abi dibénedo nanomo cuemo itífuedo llavécaigacue. Dinómona fiénidifue cuemo íoicaide. Iocaillamona fiénidifuiaina jaca finócaidicue.

Juzíñamui Ñuera Joreño úicaigamié illafue bie izoide

8 ¹ Mei ja benómona, nana Jesucristomo dájena jaináidinomo duere finótaituiái jaca iñede. Afémaci Juzíñamui Ñuera Joreño ríinodo afe Joreño illa izói ífirediaíoi. Dáanomo afémaci nanómona comécimo

itífuiyai izói comécíñediaioi. Daje izói nánorafuiaina náfueñediaioi. ²Juzíñamui Ñuera Joreño cai rairuilla uai, dájena Jesucrístomo cai jaináinamona, caina ñue cáataite. Afe llezica caina rairuide Ñuera Joreño uai, afe nanómona cue rairuilla fiénide uáimona cuena oni jírecaitade. Afemona fiénidífue ana tíllinomo cuena úiñeite. ³Moisés ocuica uáimona finónidífue, Juzíñamui daade ie Jitó ana óriano áfena finode. Afe caimo ite fiénidífue mona oni cai jírecailafue Moisés ocuilla uáimona finónide, mei nanómona cai comécimo fiénidífuiyai íllado, afe uai rínonideza. Iemona afe uai figo jínoñede. Ie jira Juzíñamui cai oni jírecaitallena, daade ie Jitó jamai cómena bie éniemo jéicitade. Afe mei, cai fiénidífuiyai ícoinia cai ífomo Juzíñamui ie Jitó fatátate. Bie izói daina daífacade, bínimo ite fiénidífuiaredino comínina íaioi illa izói, afe izói Juzíñamui ie Jitó ana bínimo orede. Afe bie izoide ória mei, afémie abi, cáie izói eroide, mei íadi afémie íaifuenide. Afe izói ie íllamona afémie bíniedo ua nífuenidimiena jáicaillado nana caimo ite fiénidífuiaina anáfenode. ⁴Mei ocuica uai jeire cai ólona, afémie nana bie izói finódeza, mei ja nano cai comécimo comúdífuiaimo comécíñedicaiza. Afena ja náfueñedicaí. Mei jíáífodo Juzíñamui Ñuera Joreño ífuiaimo comécíioidicaí; aféfuiaina ñue náfueticaí.

⁵Nano comécimo fieni comúdífuiaimo comécíidino, daa bie cai abi ífuiaimo izire comécido llícíoidiaioi. Mei jíáífodo Ñuera Joreño ífuiaimo comécíidino afe Ñuera Joreño daináuaimo izire comeci fáioidiaioi. ⁶Da bie cai abi ífuiaimo comeci izire cai llícíoia, ana tíllinomo caina uite. Mei jíáífodo Ñuera Joreño daináuaimo izire comeci cai fáioia, zíñona illífuemo caina uite. Iemo daje izói caina caimare uái illínomo uite. ⁷Daje bie cai abi ífuiaimo izire comeci llícíoidino, Juzíñamui uáitatímacina jáidiaioi, mei afémaci, nana comini Juzíñamui ocuilla uaina gáíñediaioiza. Afémaci áfena gáíñenamona afe uai anamo índiaioi. ⁸Ie jira nano cai comécimo comúdífuiaimo jaináidino Juzíñamuina ióbitanidiaioi.

⁹Mei íadi Juzíñamui Ñuera Joreño ja ómoimo íllamona, comécimo fieni itífuiaimo, cuinaca izói, izire jaináíñediomoi. Mei jíáífodo Ñuera Joreño dájena iere jaináidíomoi. Cristo Ñuera Joreño ina inédimie Cristo íeñede. ¹⁰Cristo ómoimo íllamona ómoimo ite joreño caade. Ua, Juzíñamui anamo ñue jáicina itábicaillamona omoi joreño cazítaga izoide. Mei íadi afe llezica caimo ite fiénidífue cai abina ana tíllinomo uite. ¹¹Mei jíáífodo Jesucristo tíllanomona Juzíñamui Ñuera Joreño do meine abido cáadimiena jáitaga. Iemo afe Cristo cáadena jáitate Juzíñamui omoi tíífírena abina nane meine cáadena jáitaita. Ua ómoimo ite Juzíñamui Ñuera Joreño do Juzíñamui cáadena jáitagamacina ómoína fínoite.

¹²Amatíai, mei daí cai comécimo fieni ífiredífuiaimo comécííñellena, izire ocuícánodicaí. ¹³Da bie omoi abi ífuiaimo omoi comécíioiadi,

tíllinomo ana ómoína uite. Bie cai comécimo itifue jaca fiénidifuenta caina finótate. Mei íadi afe ómoína finótate fiénidifue Ñuera Joreñoodo omoi anáfenoiadi jaca ninomo cáaitiomoí.

¹⁴Nana Juzíñamui Ñuera Joreño ifócamaci, Juzíñamui úruiai. ¹⁵Mei jii, ómoímo iga Ñuera Joreño, jacire ráiruite joreñoede. Daje izói ómoímo ite Ñuera Joreño ómoína meine jacíruiñede. Mei íadi afe ómoímo iga Ñuera Joreño Juzíñamui jitótaiina ómoína mamede. Afe Joreño Juzíñamuina “Cue Móodio” caina daiítate. ¹⁶Da bie Ñuera Joreño caimo ite joreño diga, dájena nabáizaibite “Juzíñamui jitódicai” caina daiíllena. ¹⁷Afe daií ie jitótaiina cai íllamona, Juzíñamui raire uícodo caimo lloga feci raa izoide cáimafue maiñoredicai. Afe cáimafue dama Cristo ie, mei afémie Juzíñamui nahí Jitoza. Mei íadi ja birui áfena daane afémieoiri maiñoredicai. Afe Cristo duere zefuilla izói, daane birui duere cai zefuíadi, Juzíñamui caina cfoite. Iemona Juzíñamui ebíredifuenta íemo nitalle izói, afe izói caimo nítaite.

¹⁸Iemona ja biruíllaido duere cai zefuilla figo ráañenamo comeci facádícue. Afefue ráañenari ióbidícue. Ua afe aillóñedeza áfena lloñédícue: mei afe uire caimo cómuíte ñue ebíredifue jamánomoideza. Afe ebíredifue duere zefuíllafue baímo jamánomoideza, afe duere zefuíllafuenta úibiñoñeiticai. ¹⁹Nana Juzíñamui finoca cómena maméíñedínuiái, Juzíñamui jitótiai meine cáadino jaillano jino cfoíalliruimo iere izire úiñoídiái. ²⁰Ua comínimo ite fiénidifue ícoína, nana afe Juzíñamui comuítaganuiái zuure fíallífuemo mamécaíai. Dani íaiói jítainamona aféfuemo mámeñegaíai. Mei íadi Juzíñamui daií íaióina mamede; afe ie comeci jítaina ízoi mamécaíai. ²¹Mei afémie nana ie finócanona riire ocuífufuemo oni jirénoiacade. Daje izói ie finócanona niné táinocaitífuemo oni jirénoiacade. Afe íaiói jirénollífuemo Juzíñamui ñue coméciide. Daií íaiói oni jírecaitaite, Juzíñamui jitótiaíoiri ebire jaícina joide cáimafuena íaiói maiñórrillena. ²²Onódicaiza, jaiái fiénidifue bíniemo tainéinanomona, nana Juzíñamui finoca cáadinuiái abi izírenari murífrediaíai. Ua jaiáimona nai biruimo, ringo úrue jocóacana llezica izínailla izói, nana ie comínina mámeñega comuítaganuiái izi cácaíai. ²³Daa afémaci izi cácañenaza; daje izói cai izi cácaillano, afe caina jaícina ñúeitallíruido izire ocuíríticai, Juzíñamui Ñuera Joreño caimo ite íadi. Juzíñamui ícoí aillo caimo fecalle caimátaíllífuíaimona, bie Ñuera Joreño fueñe raire uícodo caimo iga. Mei íadi nai bíniemo iere zuure murífredicai; mei Juzíñamui jitótiai maméidicai íadi, móonidíza jíáie come íena náamataja izói, cai ie náamataíllíruimo ocuíríticaiza. Aféruimo nana fiénidífuíaimona, naa jíáie cai rairuíoide íafuíairi, Juzíñamui cai abina oni jírecaitaite. ²⁴Afe bie cai jíllollífuemo úiñoídicai. Jesucristo daií caimo llogáuaimo afe jeire cai úamona, afemo úiñoídicai. Afemo daií izire cai úiñoínado jíllotagacai.

Cai úiñooga raana cai ciónamona, jae áfemo úiñoñeiticai, mei jae íteza. ²⁵Mei jiáifodo cai cióñena raamo cai úiñoiadi, ja áfemo raire járitañeno úiñooredicai. Iemona Juzíñamui Ñuera Joreño, Juzíñamui jítótiaina cai maméinamo uaina nabaide.

²⁶Daje izóí Juzíñamui Ñuera Joreño mei nifue Juzíñamuimona cai jicállena ñue caina cánuaibite. Juzíñamuimona jaícina ie jitailla izóí cai jicajana onóñedicai. Mei daíí cai illa llezica, Ñuera Joreño come uaido jino llónide murilla uaido Juzíñamuimo caído izire jicade. ²⁷Juzíñamui naga come comeci ífuena ñue onóillena izire jicánofiredimie. Afemona Ñuera Joreño caído daífacanana Juzíñamui ñue onode, mei Ñuera Joreño, Juzíñamuimo jaináidinodo Juzíñamui comeci jitailla izóí izire íaioimo jicádeza.

Nana zuure íaifuiaimona caifófecairedicai

²⁸Onódicaiza, Juzíñamui nana cómemo ífcaitifuiaina ñue jaícina mamede, nana íena izíruitino ñue íllena. Ua Juzíñamui comeci jítaina izóí, ie jíriganano ñue íaioi íllena, Juzíñamui illa dígamieo cómuitifuiaina ñue jaícina zúitafirede. ²⁹Mei Juzíñamui nana ie uícodo onóigano nanómona mamede, ie Jitó illa izóí íaioi íllena. Bie izóí íaioi íllamona Juzíñamui Jitó ámatiaina itfaioi. Afemona aillo ite ámatiaí cígimona Jesucristo dama námiéna jaide, Juzíñamui jaiái uícodo mámia izóí. ³⁰Nana daíí ie mamécanona, daje izóí íaioina jírrite. Nana ie jíriganona, daje izóí ie anamo ñue jaícina itábicaitate. Daje izóí, nana daíí ie anamo ñue jaícina itábicaitanomono Crístomo nitaca ebíredifuenta afe izóí íaioimo nitade.

³¹¿Bífuena nie izóí dáititicaí? Juzíñamui cai dibénemo íadi, ¿mei bu caina anáfenolle? ¡Cai anáfenoitena íñede! ³²Juzíñamui dama ie daade nahí Jitona cáimona rairuíñede. Mei jiáifodo nana ñue cai jíllloillena, ie daade Jitó titállena jeruíñeno fecade. Iemona onódicaiza, nana jíaie cai jitailla ríiduana naa ie Jitóoíri nágarui caimo fecáfireite. ³³Juzíñamui nizécamacimo, ¿bu fiénidifuenta nitárena? Afe izóí nítaítimie íñede, mei afémaci nífuenidinona Juzíñamui jae jino uáfodo llógaza. ³⁴Afe Juzíñamui nizécana, ¿mei bu duere finótarena? Íaioina duere finótaitimie jae íñede, mei Jesucristo íaioi ícoínia tízaibiteza. Afe baímo Jesucristo tíllanomona meine abído cáadiména jaillano, Juzíñamui nabézimo ráinazaide, dínomona Juzíñamuimona cai ie canóllifuenta izire jicállena. ³⁵Cristo cai ie izíruillana, ¿bu mei féitarena? ¿Meita duere cai zefuíadi, Cristo caina izíruillana féitaite? Féitanide. ¿Meita llotáiredifuiái caina ie izíruillana féitaite? Féitanide. ¿Meita fiéni caina finóacadino caina ie izíruillana féitaite? Féitanide. ¿Meita júbietaillafue caina ie izíruillana féitaite? Féitanide. ¿Meita ínícuironinafue caina ie izíruillana féitaite? Féitanide. ¿Meita jácifuiái caina ie izíruillana féitaite? Féitanide.

¿Meita tñizaillafue caina ie izíruillana féitaite? Féitanide. ³⁶Juzíñamui Cuega Uai bie izói dáideza:

Nágaruillai o ícoinia tíllanomo áinozitagacai, mei íadi tñíñedicai.

Daje llezica caina titalle ovéjiaí izói mamédiaioi.

³⁷Mei íadi nana bie zúuredífuiaimona, caina izíruitimie Jesucristodo, caifófeficaidino baimo ñue jino jáidicai. ³⁸Iemona ñue onódicueza, Juzíñamui cai ie izíruillana ráruitena íñede. Naga raamo cai jíriadi Juzíñamui féitañeno caina izíruioide. Cai tíllifue Juzíñamui caina izíruillana cáimona feitañeite. Daje izói bñiemo cai cáanafue caina ie izíruillana cáimona rairuínide. Daje izói Juzíñamui abi imaci caina ie izíruillana cáimona rairuínide. Daje izói fñeni rñinorede joría caina ie izíruillana cáimona rairuínide. Daje izói biruido comuídfuiaí caina ie izíruillana cáimona rairuínide. Daje izói uire cómuitífuiaí caina ie izíruillana cáimona rairuínide. ³⁹Daje izói Juzíñamui abi imácimona ríllaini caina ie izíruillana cáimona rairuínide. Daje izói Taifemo jaináidino ríllaini caina ie izíruillana cáimona rairuínide. Ua nana Juzíñamui finócanuiaimona buna Crístodo caimo jino cñotaga izíruillana cáimona rairuínide.

Juzíñamui jiaí uícodó Israel nairai nizede

9 ¹Ja birui jíáifue ómoímo llóitícue. Crístomo cue jaináinamona táinona llóñeítícue. Daje izói Juzíñamui Ñuera Joreño nabáioicaigacueza cue comeci urilla uai ñue jino deide. Afedo bie cue llollífue nahí ua ráfueza, onódícue. ²Be niie: nana cue nairai comíniri iere zúruítícue. Afémaci Crístomo fñoñenamona zúufueri comécina cuidíridícue. ³Iemo mei cue dáinamona nibai afémacina jíllotareníadi, Juzíñamuina, “Mai fñeni cue faido,” nibai raire dáitícue. Mei íadi cue daina izói Juzíñamui cue faidódena, cue nairai imácina cánoñeite. ⁴Afémaci jiaí Juzíñamui nizécamié Israel, méifomo comuícana jáidino. Daje izói afémacina Juzíñamui daide:

—Bimaci cue nairai, —daide. Afe mei íaioi cígimo ie íllado íemo ite áíllue ebírede ríno Juzíñamui íaioímo jino cñótate. Daje izói íaioina ie ñuera finóllífuaí Juzíñamui íaioímo llote. Iemo Juzíñamui Moisédo ocuica uaina llogáiaioi. Daje izói Juzíñamuina nahí caimátaitajana onótagaiaioi. Daje izói Juzíñamui lloga caimare íaioi íllíuai íaioímo íteza. ⁵Bimaci mámecina jíca jalleide judíuai jáidídigimamona comuítagano. Iiraínomo íaioi náiraímona Cristo cómena jócuabíga. Bífuaímona Juzíñamui naga ráfuaí jamánomo ocuíllana onódicai. Iemona nana náiraímona illa dígamíiaí Juzíñamuina jaca ninomo fáicanocaiñeno íóbitarediaioi. Mai daí íteza.

⁶Díga ñúefuaí cue náiraímo duide; mei íadi Crístona náfueñediaioi. ¿Mei nñbai? ¿Níbai Juzíñamui uícodó lloga Israelna ñuera daináuai figo

déizaibiñede? Daí daiñedicueza. Jiáifodo jóide. Nana Israel náiraina maméidinomona dáarie Juzíñamui nízeñegano. ⁷Daje izói Abraham méifomo comuídino dáarie ie nahí úruiañediaioi. Jaiái úcodo Juzíñamui Abrahana daide:

—Dama Isáacimona cómutino o uáfueña méifomo comuídina jaille, —daide. ⁸Bie uai jiáifuena cai onótateza: Dámie ñuera náiraimo jócuado, dama áfede “Juzíñamui jitódicue” daiñide. Mei jiáifodo Juzíñamui úcodo daina uai fúitamona jocócana, dama afémaci ie uáfueña méifomo comuídina mameína. ⁹Juzíñamui Abrahana úcodo daina uai be ñie: “Uire afe nauí cue mamécaruimo meine bíiticue; íemo o ai Sara jitó jócoite,” daide.

¹⁰Iemo nai jiáifuena ite. Rebeca jitó faillinoi dáamiena móorediaillinoi. Iaillinoi moo cai jaiáidigima Isaac. Afe jitó faillinoi guarázailinoi. ^{11,12}Mei íadi faillinoi nai jocóñeniadi, afe ménaillinoi nai níífuenina illa llezica, Juzíñamui Rebécana daide: “O jitó nánoramie ie méifoide ama anamo jabóidimiena íite.” Juzíñamui daí daide, bífuena cai onóillena: Afe iaillinoimona dáamiena Juzíñamui nizéllena dama Juzíñamui comeci jítaina izói mamede. Afe Juzíñamui faillinoimona dáamie níziafue íaillinoi finócafuemona comuñede. Dama Juzíñamui mámiomona íaillinoimona dáamie nizécamiéna jaide. ¹³Juzíñamui Cuegáuai bie izói daide: “Jacob cue nizécamié, íemona cue izíruigamié, mei íadi Esaú cue ruífruigamié.”

¹⁴Iemona dáarie ñibai dáítiaioi: “Juzíñamui daí dáamiéna fia ruífruillano jiáimie nizeda máíñua jaícina jóíñede.” Mei íadi bie comini daínauai uáfueñede; jaícina jóíñedifuena Juzíñamuimo jaca íñede. ¹⁵Mei Juzíñamui Moisená ja dáideza: “Daa cómemo cue dúecaianadi, afémiemo dúecaiticue. Daje izói daa cómena duéruillano riire íbana cue óiacañeniadi, íemo íbana óñeiticue.” ¹⁶Bie Juzíñamui daina uáimona onódicaiza: Juzíñamui dáamie eneno nízia afe come óiacanamona daingo comuñede. Daje izói afe come riire fínuamona Juzíñamui níziafue comuñede. Juzíñamui afémié nízia dama cómemo Juzíñamui dúecaianamona comuide. Daje izói afe ímana ie canóacanamona comuide. ¹⁷Mei jii, Juzíñamui ie Cuegáuaido, Egipto illáimana daide: “Ja illáimana o jóneticue, cuemo ite áillue ríino jiáímacimo odo jino cíotallena. Afe llezica iere duere o cue finólledo cue mámecei naga náiraiáido jica jalléitaitio,” daide. ¹⁸Ie jira onódicaiza: Juzíñamui dama ie óiacana izói, daa cómemo dúecaite; íemo Juzíñamui dama ie óiacana izói jiáie come comécina ríireitaite.

¹⁹Bífuiaimona daa come ñibai cuena jicánoite: “Mei Juzíñamui afe ie óiacana izói finófiredeza, jiáifodo ínidicai. Iemona ¿ñibái mei fiénidifue ícoínia caimo nitáfirega? ¿Bu mei Juzíñamui óiacanafuena uáitarena?” ²⁰¡Ací! ¡Daí daínamié cacai! ¿O iere ua ímiedicue daidío, Juzíñamuimo

riire júfidollena? Mei nana Juzíñamui comúitagacaiza bie jíáifuemo coméciiri. ¿Mei nibái nogo, afe nogo niráingona dáiiite: “¿Nibái mei cuena bie izói nitio? ¡Dáiiñeite! ²¹Nogo niraingo daingo ie comeci óiacana izói afe nogóraina nírede. Afe daje nógorafella átuedo daa ebire eroide icfruna nírede, íemo daje nógorafella enéfenemona jamai nogócirina nírede.

²²Iemona daje izói Juzíñamui finócafuiai ñúeraza, onódicai. Afémiemo íñoñedinona Juzíñamui duere finótaacade, íemo ite fiénidífueña gáíñenana jino ácatallena. Afe llezica íemo ite aillo ñuera ríino jino comínimo onótaiacade. Mei íadi afémaci fiени illafue íbana raire otátañede. Ie icírafue anamo itínomo, Juzíñamui raire comeci járitañede. Iaióimo dúide niné táinocaitallífueña nai are ocuínede. ^{23,24}Daje izói Juzíñamuimo ite jamánomo ñuera ebíredinona comínimo jino onótaiacade. Iemona Juzíñamui dáarie judíuai, daje izói dáarie judíoñedinona nizeda íaióimo dúecaide. Dúecaillano íaiói fiени illafue íbana oñeno íaiói jíllotate. Afe ie dúecaillado nizécanodicai. Afémie íaiái uícode, íemo ite ebíredífueмона afe cáiena oni cai mainóllena caina mamede. Daíí fínuamona, íemo ite jamánomo ñuera ebíredífuiái Juzíñamui caimo jino fidítate. ²⁵Íaiái Juzíñamui uai jino llóraima Oseas cuegánicomo Juzíñamui bie izói daide:

Cuemo íaináíñede comínina “Cúeiena” náamataíticue.

Daje izói nauí cue izíruíñega náiraina “Cue izíruigamacina” mámeíticue.

²⁶Daje izói batí jíáie éniemo itínona Juzíñamui daina “Cue comíniñediomoi,” afénomo itínona “Cáataite Juzíñamui jítotiaina mamélliaíoi,” —daíí Oseas daide.

^{27,28}Mei íadi Israel nairai dibénemo Isaías daide: “Israel comini iere aillo jebuídiaíoi, ua monáillai fuédamo ite facádonide guamáíjiaí izói, jamánomo áillomaci. Mei aillo jebuídiaíoi íadi, afe náiraímo Juzíñamui raire duere finótalle mei, daa dúemacina fiébitiaíoi. Dani afe dúemaci jíllotiaíoi. Mei jíi, Juzíñamui ie daina uai izói náiraina duere zefuúllífue jino zúítaite.” ²⁹Dáamie Isaías afe duere zefuúllífue uícode llote:

Mei jamánomo ríinorede Juzíñamui, caina due méífomo cómuitínona níriñeniadí, Sodoma íemo Gomorra díga íofue nairai niné táinocailla izói niné táinocaiticai, —daide.

Jesucristo cai jíllotalle núefue daje izói Israel comínimo dúide

³⁰Cai lloga uaillai bie izói daííacade. Be níie: Judíoñedíno Juzíñamui anamo ñue íaicina íaiói illínona figo jenóñediaíoi, mei íadi Juzíñamuimo íaiói ínuamona, Juzíñamui anamo ñue íaicina itátagaiaíoi. ³¹Mei jíáífodo afe Israel nairai, (judíuaina maméidíno) Juzíñamui anamo ñue íaicina íaiói itátaite ocuilla uáillaina jenódiaíoi, mei íadi afe uáillaina

ñue ícoimo figo dúcitañediaioi. ³² ¿Nibái mei afeno baiñediaioi? Mei Juzíñamuimo ínuado íaioi comeci ñue jaícina jóillifuena jenóñediaioiza. Dani íaioi nícidogafuiaimo coméciidiaioi. “Nibai aféfuiaido Juzíñamui anamo ñue jaícina ííticai,” daidiaioi. Ie jira Juzíñamui oreca jóllotaitimiemo, niie Jesumo, uíeco riire finódiaioi; ínuano Juzíñamui anamo ñue jaícina íñediaioi. Come iodo jáiadi éicitaila izói, Jesumo éicitaidiaioi. Afémie iomo éicitaitate nofici izóidimie mei afémie núemie, mei íadi ruifruigamie. ³³ Juzíñamui Cuegáuai afémie dibénedo bie izói úrite:

Omoi cácarei, judúuai iomo éicitaitate nofici izóidimiena jóneticue. Afemo comini éicitailano oni nibéfodo báitiaoioi.

Mei íadi nana íemo ínotino íena méairuñeitiaioi.

10 ¹ Cue ámatiai, nane ómoina dáiticue: Cue nairai israelitas imaci jóilloillena, nana cue comécido izire óiacadicue; íemo áfena Juzíñamuimo jíacíredicue. ² Bie núefue afémacimo nitáredicue: Juzíñamui comeci jítainafuemo nágarui iere járidofirediaioi. Mei íadi áfena ñue jaícina íaioi fidíñenamona daíí táinomo járidotiaoioi. ³ Comini Juzíñamui anamo ñue jaícina ie itátallifuena, íaioi ífócimo ñue denóñede. Mei jíáífodo Juzíñamui anamo itábicaíñeno dani íaioi mameca comeci ñue jaícina jóitaitífuemo járidotiaoioi. Ie jira Juzíñamui lloga ñue jaícina itátaitífuena maiñóñediaioi. ⁴ Mei jíi, Cristo billano nana íemo ínotino Juzíñamui anamo ñue jaícina itátagaiaioi. Ie jira comini Juzíñamui eróicana ñue íaioi íllena, Moisés ocuica uaimo dani íaioi níciduafuena Cristo jae féitate.

⁵ Ocuica uai jeire úado Juzíñamui anamo ñue jaícina cai illífue dibénemo Moisés bíena daide: “Nana ocuica uillai dáamie ñue ícoimo fuitáadi, áfede afémie are iite.” Mei íadi afe uáillaina ñue jeire otímiena íñede. ⁶ Mei jíáífodo, Jesumo cai ínogafuedo Juzíñamui anamo ñue jaícina cai illífuena Juzíñamui Cuegáuai bie izói daide: “O comeci anado bífuena daíí jícanoñeno iri: ¿Bu mei caifo monamo jaille, Cristo ana cai jóllotataíbillena? ⁷ Daje izói bie jíáífue daííñeno iri: ¿Bu mei ana tífidino illánomo jaille, afénomona Cristo caína caifo jóllotataíbillena?” ⁸ Juzíñamui Cuegáuai bie izói daide. Be niie: “Aci, Juzíñamui jóllotaja uaina ja cacádiomoi. Ie llógamo ja coméciidíomoi.” Bie uillai ómoimo cai lloga omoi ínollífue. Be niie: ⁹ O fúedo jino comínimo “Jesús cue nahí Ocuíraíma,” o daííadi, nane daje llezica afémie tíllanomona meine abido cáadimiena Juzíñamui jáitagamiemo o comécido o ínoiadi, ua jóllotio. ¹⁰ Mei Juzíñamui anamo ñue jaícina cai itábicaillena, afémiemo comécido íñoredicai; ie mei Jesucrístomo nahí cai jáináinafuena, cai fúedo jino comínimo llóredicai, áfede ñue cai jóilloillena.

¹¹ Juzíñamui Cuegáuai daide: “Nana íemo ínotino íena méairuñeite.”

¹² Jesucristo nana náiraímo daje uaido úrite. Judíoñedinona

éenoruiñeno daje uaido íaioimo úrite, naa judúuai diga. Nana nairai Ocuíraima daade Jesucristo; nana afémiemo jicádinomo afémie jaca dúecaifirede. Ja ie jira íemo ite jamánomo ñúefuiaimona íaioimo fecáfirede. ¹³Mei Juzíñamui Cuegáuui daíí dáideza: “Nana cai Ocuíraima Jesucristomo jícaitino jíllloitiaioi.” ¹⁴Mei íadi Crístomo nai íaioi ñinoñeniadi, ua afémiemo jicánidiaioi. Daje izói afe jíllolle uai nai íaioi ñue cácañeniadi áfemona nai ñinonidiaioi. Iemo afe uai jino llóraima nai íñeniadi, afe uaina ua cacánidiaioi. ¹⁵Afe izói, uai jino llóraimana nai íaioi ocuñeniadi, afe ñúefue uaina ua jino llónide. Jira Juzíñamui Cuegáuui bie izói llote: “Núefue lluaíbitimie billa iere ñuera.”

¹⁶Mei íadi nana cue nairai imaci, Cristo daina núefuena jeire oñediaioi. Jaiái uai llóraima Isaías dama bie izói daide: “Ocuíraima, cai lluaíbigafuena ijaca buna ñinoñena!” daide. ¹⁷Aféfuiamona bie izói onódicai: núefue fidínamona comini ñinotinaonona jáidiaioi. Iemo dáamie Cristo daina uai jino lluaíbillamona, comini afe núefuena fidídiaioi.

¹⁸Mei íadi jicánoticue: ¿Mei nibái nana judúuai afe núefuena fidíñediaioi? ¡leñede! Ja fidídiaioi. Juzíñamui Cuegáuui daje izói llote: Afefue llóraini úrilla uai nana énie náiraiáido cácaaide.

Íaioi daináuailai nana énie fuédamo jica itínuiaimo ñue jalleide, daide.

¹⁹Dánomo nane jíaífuena jicánoticue: ¿Mei nibái afe cacánafue Israel comini ífócimo nai figo déñede? Dáamie Moisés, Juzíñamui dibénedo fueñe uai ote. Moisedo Juzíñamui daide:

Ua comíñedímacimona ómoína úradoitaiticue.

Daje izói abina onóñede nairai ícoínia ómoína ícírítaiticue, daide.

²⁰Afe mei Isaías jacríuiñeno Juzíñamui dainafue llote. Be ñiie:

Cuena jenóñedíno ja cuena baitíaioi.

Cuena jícanoñedínomona dama cue abina ja onótaticue, daide.

²¹Israel nairai dibénemo Juzíñamui daináuui Isaías llote. Be ñiie:

“Nágaruillaído cue uaina náfueacañedinona uáidotícue. Mei íadi fairíoñediaioi. Daje izói cuena uáitaoidinona uáidotícue, mei íadi náfueñediaioi,” daide.

Israel náiraimona dáarie jíllloitiaioi

11 ¹Iemona nane jícanoticue: ¿Ja nibái Juzíñamui ie nízeza Israel náiraina ruífruíga? ¡Jaca íeñede! Mei cue dama Israel nairai ímiedícue. Daje izói Abraham izíedícue. Iemo Benjamín comínimona comuídícue. ²Jaiái ñinomo uícomo íeiena onoíga Israel comínina birui ruífruíñeite. Uáfueza, uai llóraima Elías daina uaina onódiomoi. Aféuui Juzíñamui Cuegánicomo ite. Juzíñamuimo Elías jícaja llezica, Israel nairai fiene ñinócafuiái íaioimo riire jítrade. Daide: ³“Cue Ocuíraima, o uai jino llórainina fatíaioi. Daje llezica o íóbitalle illánuiaina ñiné

táinocaitatiaioi. Afemona dama cue fiébilla. Iemo daje izói nane cuena titáacadiaioi,” daide. ⁴Mei íadi Juzíñamui ie uai fairíote: “Siete mil dígamaci eneno cúeiena ja níriticue. Afémaci afe taino juzíñamui Baal jánarai anamo caiñici ífodo dújuñediaioi, ie íóbitallena,” daide. ⁵Ie jira daje izói birui judúuaimona finote dúemacina eneno mamécaiaioi. Juzíñamui nana comínimo dúecaillano daa bimácina oni eneno nizede. ⁶Bie níziafue Juzíñamui caimo dúecaillamona comuide. Iemona come finóacanamona comuñede. Mei íadi cai níziafue come finóacanamona comuídeniadi, Juzíñamui caimo dúecaillafue nahí caimare dúecaillafueñede.

⁷Bie daináfue ¿mei nífuena cai llote? Be níie: Israel comini íaioi jenoca Juzíñamui anamo ñue jaícifuena baiñédiaioi. Mei íadi Juzíñamui nizeca dúemaci afe íaioi jenócana otíaioi. Ie mei baiñédimaci Juzíñamui íaioi comécina ríiretade. ⁸Juzíñamui Cuegáuai daií daide: “Bimácina Juzíñamui comécina tíidino izói finode. Uina cóiñedino izói íaioina finode. Daje izói jefona cacáiñedino izói íaioina Juzíñamui finode. Nai afémaci jaca biruíllaímo bie izói itíaioi.” ⁹Iemo jíái David Juzíñamuimo jícajano daide:

Juzíñamui íóbitallena íaioi finoca güilláfuaiaí táinona finódiaioi.

Afe jira Juzíñamuina daidícue: Mai duere íaioi finoiri.

Iemona aféfuiaí tácofo izói íaioímo jáiteza; daje izói llójeji izói jáiteza.

Afe táinona finócafuaímo éicitaillano izói duere finólliaioíza.

¹⁰Daje izói uina níridino izói mai mei íaioi jáilleza, Juzíñamui ñúefuiaí íaioi ónoñeilleza.

Iemo nágarui iere baizídaitaganona ítiaioíza, daide.

Judíoñedino jíllotafue

¹¹Ja birui nane jícanotícue: ¿Ja níbai judúuai íaioi éicitaillamona níne nana táinocaitalliaioi? ¡Jaca íñédeza! Mei jíáífodo judúuai Juzíñamui lloga uaina cacáacañena llezica, judíoñedino aféuai cacáillano íaioi jíllloillí fue maiñódiaioi. Afe íaioi máíñua Israel comínina úradoitate, afe jíllonafue otino illa izói íaioi íllena. ¹²Iemona judúuai íñoñenafue íirainomo nana náiraiaína canode. Afe judúuai ícoímo fuitáñeno zófenocaillafue, judíoñedinona ñue canode. Mei íadi judúuai meine abido Jesumo ínuaiilla llezica, nana náiraiaí jamánomo ñue ézicilliaioi.

¹³Ja birui judíoñedinomo úriticue. Mai omoí cácarei. Mei judíoñedinomo ñúefue llujíllena Juzíñamui orécacueza, afe bie cue llócaillífuemo iere járitaiíredícue. ¹⁴Níbai afemo ríire cue táijinamona, cue nairai comini, omoí illa izói íacaitiaioi; afe izói íaioi íllena jítaidícue. Afemona afémacimona dáarie ñue jíllobicaitiaioi. ¹⁵Mei Juzíñamui judúuai ruifíruillamona nana jíáie nairai Juzíñamuimo

comeci caimare uái illáfuenta llogáiaioi. Iemo uire judúuaina íaioina Juzíñamui caimare dáanomo uáidua llezica, iere jamánomo caimare nana íitcai. Ua aféruimo tíide meine abido cáadena caimare illa izói caimare íitcai. ¹⁶Mei jii, Abraham Juzíñamuimo dúinamona, nana ie anamo comufoicaidno Juzíñamuimo dúidiaioi. Daje izói da amena jáinao Juzíñamui íeiena maméiadi, daje izói nana afe amena ícairuai Juzíñamuimo dúide.

¹⁷Mei íadi dáarie Abraham anamo comuídino íaioi íinoñenamona Juzíñamui comínina íneillena ruifruigaiaioi; íemo ie uai jeire omoi úamona Juzíñamui comínina itátagaomoi. Afe ruifruigamaci ifomo jae jóonegaomoi; jóoneficaillano Juzíñamui Abraham imácimo lloga ñúefuiai daje izói llínorediomoi. Ie jira judúuai ñuera olivo amena naa ie ícairuai diga izóidiaioi. Iemo omoi nano fueñe jazici amena ícairuai izóidiomoi, mei judíoñediomoiza. Jae judúuaimona dáarie íaioi íinoñenamona amena ícairo jaitaina izói jaitácaiaioi. Afe mei omoi ínuamona afe jaitácacairuai méifomo jóonegaomoi. Ua, jaiái jaitaca ícairuai jíáie aménamona méifomo zicóllena jóonegano izóidiomoi. Birui daje moi ícoraimo jáináidiomoi. Afe ñuera olivo íjido cáadiomoi. ¹⁸Ie jira abina ínoñeno iri. “Olvomona jaitaca ícairuai izóidimaci baimo ñúeracue” daíñeno iri. Afe izói daíñidiomoi, mei ñuera olivo moi ícoraíaina cáatañediomoiza; dani jíáinamona zicóllena jóonega ícairuai izóidiomoi. Mei uáfueza, dani Juzíñamui nizeca comínimo birui omoi jáináinamona ie lloga ñúefuiai llínorediomoi.

¹⁹Nibai dáamie dáíte: “Dáarie afe ñuera olivo ícairuai jaitácaiaioi, afe méifomo cue jóonellena”. ²⁰Jíáinamona ñuera olvomo zicódiomoinia ñuera, mei íadi jaitaca izóidimaci jíáifo joide: Juzíñamuimo íaioi íinoñenamona jaitácaiaioi. Dani omoi ínogafuemona jóonegaomoi. Iemona áfedo dani abina ínonidiomoi. Mei jíáífodo omoi jaitábiza abina ñue omoi rairuiri. ²¹Mei Juzíñamui nano nizécana figo íaioi íinoñenamona jízíñeno íaioina ruifíruite, afémie daje izói omoi figo ínoñeniadi, amena ícairo jaitaina izói, jízíñeno raire ómoína ruifruiteza. ²²Mai bífuego omoi coméciiri. Juzíñamui daí omoi jóoniano iere ñuera. Afedo afémie ómoimo dúecaifirenana fidídiomoi. Mei íadi nane afémie iere riire jaícina ocuídímie, mei ie uaimo náfueñedimacina afémie iere duere finode. Mei jíáífodo afémie ómoiri dúecaifirede. Iemo fáicanocaiñeno ie uaina jeire omoi oíadi, ie dúecailla dibénedo íífireitiomoi. Afefue jeire omoi óñenia, jíái ómoína afémie jáitaita. ²³Mei jíáífodo judúuai nane abido ínoia, afémaci abido dáanomo jofo jóonelliaioi. Mei Juzíñamuimo meine íaioi jóonelle ríino ite. ²⁴Mei omo judíoñediomoiza, jica ite onínemaci izóidiomoi; Juzíñamui comínimo due jiza dúíñediomoi. Daí omoi illa llezica Juzíñamuimo omoi ínuado, afémie ie comínina ómoína itátate. Ie jira nano fueñe ie nizécamacimona

oni nibéfodo baiídino íaioi íinoiadi, abido daje ie comínina itátallena, Juzíñamui dibénedo jamánomo juánide.

Iirairuillaído Israel nairai jíllóitiaoí

²⁵ Amataí, omoi cacai. Afe olivo amena ráfuena ja ómoimo lloticue, uáfodo ónoñega Juzíñamui mamécafuena comécido omoi onóillena. Juzíñamui nanómona comécido mamérillafuena ómoina fidítaiacadicue. Aféfuena ónoillano Juzíñamui comínina omoi itátagafuedo abina íinoñetiomoí. Juzíñamui mamérillafue bie izói joide: Juzíñamui Israel nabémacina comécina riire finode, mei íadi nano íanori íaioi comécina ríiretade. Íaioi comeci ríireta mei, Juzíñamui nana jíáie náiraina caimare uáidote, íaioimona nana Jesumo ínotino nizéllena. ²⁶ Nana Juzíñamui óiacana dieze íemo ínotimaci ofille mei, nana Israel nairai jíllóizitiaoí. Mei Juzíñamui Cuegáuai daí daide:

Cai Jíllotaraima dani cáimona cómuite.

Afémie Jerusalén jófuemona biite. (Afe jófue jíáifodo Síóna mameide.)

Jacob meifo igímaiaí íaífuiaina afémie múíñoite.

²⁷ Íaioi fiénidífuiaí oni cue dolle mei nana ufcodo cue lloga ñúefuiaí ñue fuite, daide.

²⁸ Nana comini jíllóille uai dibénedo judfuaí fairíoñediaioí. Iemona judfuaí Juzíñamui ruíffruigaza, ie bacáuai imácina jáidiaioí. Ie bacáuai imácina íaioí íllamona Juzíñamuimo cai nabáirillino comuide. Mei íadi Juzíñamui nai íaioina izíruite, íaioí jaiáidígímaiaí ie nízia jira. ²⁹ Mei uáfueza. Juzíñamui ja ie fecaca raana abido bairíoñede. Daje izói cai ie uáiduafluena jaca jíáifodo méidoñede. ³⁰ Nauí Juzíñamui uaina ínoñediomoí; mei íadi jíái birui judfuaí daje izói íaioí ínoñenamona Juzíñamui ómoíri dúecaizaide. ³¹ Ja birui nano áinori judfuaí Juzíñamui uaina ínoñediaioí, Juzíñamui ómoimo dúecailla izói íaioimo dúecaillena. ³² Bie uáillaimona bífuena onódicai: Nana jíáie comini ie uaina dájerize ínoñediaioí. Ie uaina cai ínoñenamona fiénidífuiaí finófiredicai. Iemona Juzíñamui nana caina dájerize cai gaiga fiénidífuiaímo llaveca izóidinona jóonete. Afémie bie izói caina daide, afe méífomo afémie nana caimo dájerize dúecaillena.

³³ ¡Diga Juzíñamui ebírede comeci ífuiaí caimo ie dúecaillena, naa ie onóigafuiaí diga! ¡Afémie iere ráfuena baitádimie! Ufcodo ie mamérillafuiaína cai jino llónidicai. Daje izói eneno dáarie comínina ie níziafuiaína, onóñedicai. ³⁴ Cai Ocuíraima comeci úrillafuiaína buna onóñede. Daje izói afémiena bu llófuetimie íñede. ³⁵ Iemo jíái cai Ocuíraímamo raana izájitimie íñede, afe raa íba llínollena. ³⁶ Mei nana ráaniaí Juzíñamui comuítaga. Nana afémie finoca; daje izói íeiena nana finode. Jaca zííñona Juzíñamuina íóbioitaredicai. Aquíe izói íteza.

Juzíñamuimo ñue jaícina cai dúina uai

12 ¹Cue ámatiai, birui Juzíñamui caina dúecaillamona, ómoimo izire jicádícue. Dani omoi mai Juzíñamui anamo itábicaíri. (Dani omoi comeci gáinafue finóñeno, mai Juzíñamui comeci jítainafue omoi finori, cai ie ocuilla izói.) Juzíñamui ióbitalle rille jaiái íemo jaiái feca izói, nai omoi caana llezica, Juzíñamui anamo dani omoi mai ñue itábicaíri, íena ie ñue facátagamacina omoi íllena. Afe llezica dama íeiena eneno ñue finócamaci omoi íllamona, omoi ie ocuilla uai, mai jeire omoi oírí. Nana bífuíai ñue cai fínuamona, cai joréñodo Juzíñamuina caimátaitadicaí. ²Bíniemo ite comini comeci táinomo facáoidiaíoi. Mai, afe izói omoi íñeno iri. Mei jíáífodo, omoi comeci ífuíai, mai jíáífodo méidori. Daíí omoi comeci ífuíai omoi méiduamona afe izói Juzíñamui nana o íllafue cómfuena méidoite. Afemona Juzíñamui comeci ñue jítainafue ónoiticaí. Daje izói ie jítaina ñúefue ónoiticaí, naa ie cai ióbitallífuíai. Daje izói ie ciona jaícina jóidífuíaina ónoiticaí.

³Juzíñamui cuena dúecaillano cuemo jónegafuedo, nana ómoína dáitícue. Juzíñamui cai fibítajafuemo da comécina facáredicaí. Afedo abí cai ínolle ñuera. Mei íadí afefue baímo táinodo fínonidicaí. Iemona nana ómoímona dámie, afefue baímo dama ie abina íñoñeno iri. Mei jíáífodo illa dígamie comécina ñue jaícina facárede, Juzíñamui íemo lloga ie comécimo Juzíñamui comuítaga fínuafue daína izói. ⁴Da come abímo aillo táijide ráaniai ite. (Onoi jíáífodo táijide. Daje izói ídai táijina jíáífoide. Daje izói fue táijina jíáífodo joide. Daje izói jefo táijina eneno jíáífoide.) Mei íadí daade cai abí íadí. Naga cai abímo ite raa eneno jíáífofodo caina canode. Daje táijinamo íñédiaíoi. ⁵Daje izói, áilloziena Jesumo fínoticaí. Aillo cióidicaí íadí, daade abí izóidicaí. Ua, Crístomo dájena cai jaináinamona, dáamiede abina iticaí. Dáamacidicaí. Afe llezica dáamiedicaí abímo ite táijide raa izói, dani conímamo dájena jaináidicaí.

⁶Naga cómemo Juzíñamui jónega táijinana fibíllafue jíáífodo joide. Juzíñamui comeci óiacana izói, afémie naga cómemo fecade. Bie táijinana fibíllafue ñue jeire óredicaí. Dáamiemo Juzíñamuimona onoiga uailái jino llóllena fibítaga. Afemona áfena afémie rairuíñeno jíéruirede. Nano ie fínogafue íllaze jino llófuerede. ⁷Jíáímaci cai canófireille fibíllafue Juzíñamui caímo jóoneiadi, áfedo rairuíñeno canóredicaí. Daje izói llófuiana fibítagamie, afe ie llófuefirenamo ñue járitairede. ⁸Afe izói jíáíma comécina náiretallena fibítagamie, áfemo afémie ñue járitairede. Daje izói comini canolle raa fécafíredímie, afe íbana ie maíñóllelo coméciniide. Fia íaíoimo dúecaillano fecádenia ñuera. Afe izói comini jetállífuena ocuídímie caímare abí rairuíoicana ocuúrede. Duéredino canófiredímie, caímare íaíoína canórede.

Jesumo ínotino finórede uai

⁹Táinona lloñeno conímána izírui. Iafue bai oñeno iri, mei íadi ñúefue jeire omoi oíri. ¹⁰Jíáimana caimare nahí ama izói izírui. Afémiemona raire úcoficañeno iri, mei jíáifodo méifomo fiñeno raire fena o úcodo o otátari.

¹¹Ráiraieño jeire omoi iri. Ñue naire cai Ocuíraimamo omoi tájjiiri.

¹²Cai ocuírinafueмона caimare omoi ífireiri. Duere omoi zefuádi, áfemo raire járitañeno, fáicana caimare úriri. Juzíñamuimo úrillana jaca féitaneño iri.

¹³Jesumo ínotino jitailla raana, íaioi canóllena jeruñeno fecari. Nana omoi jofomo uáiduaibitina caimare uáidori.

¹⁴Omoi fiene finódinona ñue caimátaitari. Iaioi ibana fiene faidóño, íaioi cáimafuiai Juzíñamuimona jicari.

¹⁵Caimátaidino diga caimare omoi iri. Daje izói raamo jíridinomo omoi dúecari. Eedino diga omo eeri, íaioi fíralena.

¹⁶Conímána úradoñeno iri, dájena illa dígamieño ñue coméciiri. Daje izói fiene abina fiñoño iri, mei jíáifodo comécina mánaidino izói omoi iri. “Tere baitádimiedue” comécido daíñeno iri.

¹⁷Da come fiene omo finóadi, afe ibana afémiena fiene finóño iri.

Mei jíáifodo, nana comini eróicana iba oñeno ñue o finori. ¹⁸Omoi illa dino, nana comini comeci jacíruiñenafuedo caimare uái omoi iri.

¹⁹Cue izíruiга ámatiai, fiénidifue comuádi, ibana omoi oñeno iri. Mei íadi aféfuena fáicanocari. Afémie Juzíñamui duere finólleza. Mei jii, Juzíñamui Cuegáuai daide: “Duere finóllifue cuemo dúideza. Daje izói cue iba ólleza. Daí cai Ocuídime daide.”

²⁰Nane dánomo daide: “O bacáuai ímie jufírui, icíñeno íena ecari. Iemo afémie jiróacaniadi, ie o jirótari. Bie izói ie o fñuamona, izire íena méaicaitaitio,” Juzíñamui Cuegáuai daí daide. ²¹Fiénidifue omoi anáfenuamona abí omoi rairuiri. Mei jíáifodo ñúefue jeire omoi úado, fiénidifuena mai omoi anáfenori.

13 ¹Nana comini omoi jamánomo ocuídillaima ocuica úíñotillaini anamo ñue omoi itábicari, mei nana ocuídillaini Juzíñamui jónegaza. Afémie jóneñega ocuídimeña inédeza. ²Iemona afe úíñotillaimana uáitaidime Juzíñamui jónegamiena uáitate. Nana daí uáitatino, afe ie uáitaja ícoinia afémacina Juzíñamui duere finótaite. ³Mei jii, ñúefuena jeire ófiredino ocuídillainina jáciruiñeitiaioi; mei jíáifodo fiene finódino jacíruiñena jónegaiaioi. ¿Meita ocuídillaimana jacíruiñedimeña íacadio? Mai ñúefuena jeire o oíri. Iemona aféllaima “Facátagamiedo” ona daíte; ⁴mei afémie Juzíñamui tájitagamieza, ñúefue dibénemo o jaináillena canóllena. Mei fiénidifue o finóadi, aféllaimana jacíruiñedio, mei afémie duere finótalle ríino táinomona ínegaza. Uafue, afémie Juzíñamui tájitagamie nana fiene itino duere

finó tallena. Nana íaioi fieni finócafue íllaze ñue jaícina íaioina duere finótaite. ⁵Ie jira ocuídillaini anamo itábicairediomoi, daa duere omoi finobiñeillena, mei íadi daje izói Juzíñamui jónega omoi comeci úrilla uai jeire omoi óllena. ⁶Afe bie izói ñue omoi íllena, ocuídillaini lloga gobiérnomo íbárede úcubena íbáfirediomoi. Mei jii, aféllaini Juzíñamui táijitagano. Afe íaioi táijinamo izire járitaioidiaioi.

⁷Lemona naga cómemo dúide raana, mai jeruñeno ñue íemo ine. Gobiérnomo cai jaináinamona, íaioi ocuica úcube llíinoraima lloga gobiérnomo dúide úcubena mai omoi fecari. Daje izói gobierno caimo jicana oga raa, emódomo raiñócana áfena mai omoi íbari. Naga ocuídillaimamo dúide ñúefuedo jacíruioinafue, áfedo ñue íena omoi jacíruiri. Daje izói naga jamánomoidillaimamo dúide ñúefuena, mai áfena íemo omoi nitari. ⁸Omoi záitaiñega íbállifueña bumo itáteñeno iri; jíáifodo daa ñue íbállifue ite. Afefue jíáimana cai izíruillifue. Afemona dani conímaiaina izíruiredicai. Mei naga conímana izíruitimie, áfedo Juzíñamui ocuica uaina ñue jaícina fuitádeza. ⁹Jaiái Juzíñamui ocuica lletara uaillai daide: “Jiruífueña finóñeno iri, cómena titáñeno iri, meríriñeno iri, jíáimamo táinona lloñeno iri, jíáimiemo ite ráaniairi úradoiñeno iri.” Mei íadi bie ocuica uaillai naa jíáie lletara uáillairi daa bie dáinamo dájena itíaiói: “Dama o abina o izíruilla izói, afe izói o abi cómena izíruiri.” ¹⁰Izíruitimie ie abi cómemo fiénidifueña finóñede; íemona izíruillafuedo Juzíñamui ocuilla uaillai ñue jaícina jino zuitárede.

¹¹Nana bífuiaimo jeire omoi ua llezica, birui cai ílláruillaimo ñue mai cai uibóilli. Ja iere abi cai rairuúlliruiamo ja dúcidicai. Afemo ñue omoi comécioiri. Mei Jesucristo caina jíllotajano uire jíáiruido caina uáíbiteza. Afe ie cai uáibilliruiamo ja áinozide. Fueñe Jesús uaina cai ínuua llezica, afe cai ie uáibillirui bai jica ite, mei íadi birui ja aféruimo itícaiza. ¹²Bie énie fiénidifue árrera naio izoide. Afe bie árrera naio ja monáiacade. Jítinomo finoca fiénidifuiái ínuana ja fáicanocairedicai. Fuirárima ie abi rídua llojeco jítaja izói, afe izói íaifue cai fñoñeillena cai comeci rairuúllafueña jeire óredicai. Ie mei ñúefuedo, úzefomo itino izói macáredicai. ¹³Ua, úzefomo itino izói, mai ñue jaícina cai macalli. Jifáifirenafuemo mai cai íneilli, naa fiénide aillo güíllárenafuiai. Afe izói nana jiruífuiaimo mai cai íneilli, naa jíáie comeci meáire óiacanafuiai. Daje izói dájena comécíñedimaci izói íñeno omoi iri. Iemo jíái fiénide júfidogafuedo mai cai úriñeilli, naa úradoíllafuiai. ¹⁴Mei jíáifodo Jesucristo ñue illa izói, ie cánuado afe ñue ílláfuemo mai omoi iri. Omoi comécimo ite fieni óiacanafuemo, áfemo mai omoi comécíñeno iri. Daje izói, afefue omoi finóllemo mamériñeno omoi iri.

O ama jánana fieni úriñeno iri

14 ¹Juzíñamui uai como fueñe jabo ínotimíena, ñue jofo omoi cígimo llíinori. Afémie ínogafueña féitaiacaniadi íena caimare uáidori.

Ua, ie ñinoga onóñega uáillaimo aillo omoi úridoñoeno caimare íena omoi uáidori. ²Mei jii, “Naga raana íáiruñeno güüredicai,” daiñifredinona ite. Daje izói dáarie Juzíñamuimo jabo ñnotino “Rillena riñeno da ria llizíllana güüredicai,” daiñifrediaioi. ³Ie jira naga raana güitímie mai afe ríllena ñmairitimiena jámairuñeno iri. Afe izói, ñmairitimie, mai naga raana güitímiemo comeci ñeni facáñeno iri. Mei Juzíñamui afe íaillinoi, íemo ñinuamona, ie comínina caimare íaillinoína uáidoteza. ⁴Afémaci Juzíñamui ocuícamaciza, íaioína ñénidífuedo jicánonidio, mei afémaci óíeñedeza. Dani íaioi ocuídímiemo uai orédiaioi. Íaioi illafue riire jicánollena dama íaioi ocuídímiemo dúide. Ocuícamié illafue ñúenia, ie ocuide Juzíñamui uícomo méairuñeno náidaite. Ie illafue ñénia, ie ocuide Juzíñamui duere íena ñnoite. Mei íadi afémie ñúefue dibénemo féitañoeno íite, mei cai Ocuíraíma Jesucristo rínoñedeza, afémiena ñúefuemo jaícina jaináitallena.

⁵Daje izói, dáamié nágaruillai baimo daa illirui eneno rairuide, Juzíñamuina caimátaillena aferui judúuai ráfuenta jira. Jáímaci naga mona daje izói ñúeruillai, daidíaioi. Illa dígamie dama ie comeci úrillafuenta ñue onótaredeza. ⁶Daruina eneno ráruitímie, cai Ocuíraíma íóbitallena íeiena íllamona, aféruina eneno rairuide. Daje izói nana raana güitímie cai Ocuíraíma íóbitallena íáiruñeno güíñefede, mei afémie afe güíñeri Juzíñamuina “ñere ñigora” dáideza. Daje izói cai Ocuíraíma íóbitallena ñmairitimie ñmairillano Juzíñamuina “ñere ñigora” daide.

⁷Nana cáimona buna dama ie comeci íóbioillena íñide; daje ízoi buna dama ie comeci íóbillena ñíñede. ⁸Cai caana llezica cai Ocuídímiemo jaináidicai. Daje izói cai ñíadi, nai íemo jaináidicai. Iemona cai caana llezica, mei nibai cai ñíilla llezica, jaca cai Ocuíraíma íédicai. ⁹Mei jira Cristo ñíizaíbillano, meine abido cáadimiena jaide, cáadino náamata izói, daje izói ñíidinona náamataillena.

¹⁰Mei íadi comínina náamañedio. Iemona ñnibái mei o ama jánana ñeni úrillano íena riire jicánotio? ¿Ñibái mei íena izíruñeno jámairuitio? Mei jii, nana cai Cristo uíécomo ácatallicai. Afénomo afémie caimo ítífuenta riire jicánoite. ¹¹Juzíñamui Cuegáuai llote:

Uáfuenta jaca ñinomo cáadimiena cue íllana onódiomoiza; afe izói uáfuenta nana comini cuemo eróicana íaioi cañici ífodo dújuzaíbitiaioi.

Daje izói nana comini jino uáfodo ñúefuenta Juzíñamuimo ñítaitiaioi, daide.

¹²Iemona jae onódicaiza, cáimona illa dígamie dama ie illáfuenta afe Juzíñamuimo jáanoñoeno jino íemo llórede.

O ámana ñúefuemoni oni ñibéfodo baiñañoeno iri

¹³Ie jira benómona mai conímaiaína comécido ñeni úriñoeno iri. Mei jáíñfodo, nágarui omoi ñinócafuiaido conímana ñénidífuedo omoi

baifañeno iri áfemo mai ñue omoi mamériri. Daje izói omoi illáfuedo afémiena fieni facátañeno iri. Afemona abí omoi rairuiri.

¹⁴Jae onódicueza, nana güille naa rílleniari, dama íainideza. Ua, cai Ocuíraima Jesumo cue ínuamona, ie daina izói, cómena íáruitaita güille íñedeza, ñue onódicue. Daa “Bíena cue güíadi cuena íáruitaitaite” comécido daidímiemo, afe raana afémie güíadi íena íáruitarede. ¹⁵Mei jíáfodo, o ama comécilla rairuica güille o güíllamona o ama o rítaidi, íena ja figo izíruiñedio. Mai daade o güíacaga güíllado, Jesumo o ínote ama íaifuemo féiraitañeno iri; mei afémie jíllloillena Cristo tízaibiteza. ¹⁶Omo ite ñue finócafuiaido jíáimacina fieni úritañeno iri. ¹⁷Mei jíi, daa cai güiga raado Juzíñamui comínimo jaináñedicaí; daje izói daa cai jiroca raado afémacimo jaináñedicaí. Mei jíáfodo Juzíñamui anamo ñue jaícina cai íllamona Juzíñamui comínimo jaináitagacaí. Daje izói Ñuera Joreño caimo comútaga caimare comeci uái illáfuedo, afe dibénemo jaináitagacaí. Daje izói íeri cai íóbioillafuedo, dájena ie comínimo jaináitagacaí. ¹⁸Cristo lloga iodo jailla llezica, nana bífuiaina jeire otímie Juzíñamuina íóbitade. Afe llezica afe izói finófiredino comini ñue facátagamaci.

¹⁹Iemona, naga come conímana caimare uái itátatífuiaina nágarui mai cai jenófireilli. Daje izói conímana Juzíñamuimo baímo izire jaináitaja raa, mai cai jenófireilli. ²⁰Daa o óiacaiga güíllado, dani omoi cígiri Juzíñamui comútaga caimare dájena omoi jaináinana, mai fia táinomo fáifitañeno iri. Uafue, nana Juzíñamui finoca güille güírede, mei ja ñúeraza. Mei íadi daa o güiga güíllado jíáimana ñuera íomona oni nibéfodo o baítaidi, afe fiénide. ²¹Daje izói rille o ríamona jíáimana fiénidífuemo o baítaidi, ríllena o ríñeille, afe baímo ñuera. Afe izói vino o júruamona íena ie ínogafue o uáitaiadi, vínona o jiróñena afe baímo ñuera. Daje izói nana o fínuafuiaimona jíáima ínogafue jabo o féitaiadi, afe o finócafue fiénide. Mei íemona afefue o finóñedionia jamánomo ñuera, o ama ínogafue o féitañeillena. ²²Iemona bie güíllafue, nibai güíñenafue dibénedo o ñuera ínogafue fáicanocaiñeno, Juzíñamui eróicana dama óiena ñue o mameri. O comécido mamérillamona finóacagafuai dibénedo ñuera o daiíreniadi, áfedo caimare itio. ²³Mei íadi dámie Juzíñamuimo figo íñoñenamona ie güille jízireicana güíadi, afémie fiénidífuemo báíide. Mei Juzíñamuimo ínuamona cai onoiga íena íóbitallífué cai finoca ñuera, mei íadi nana aféfuiaí jinomo cai finócafuiaí fiénideza.

Dama o abina íóbitañeno o ínote ámana ñue íóbitari

15 ¹Nane Jesumo ínotinuiamona dámierie ñue ríñorede. Jíáimaci figo comécina náinidiaíoi. Cai ja comécina ríñoredinodicaí, íemona nai comécina ríñidinona canóredicaí. Afefue

caimo llonódacaigafue. Afedo dani cai abina ióbitanidicai. ² Cáimona illa dígamie ie ínote ámana ióbitarede, afémie ñue íllena. Daje izói íena Juzíñamuimo aillo ínotaredicai. ³ Mei Cristo dama ie abiri ióbillena jenóñede. Mei jíáífodo Juzíñamui Cuegáuai íemo zúilla. Afe uai daide: “Afe báñoridño Juzíñamui jíáima báñoia cuemo baite.” ⁴ Nana jaiái úcodo Juzíñamui Cuegáuailai cai llófuellena cuega. Aféuaimo cai comeci fírajá uai baiticai. Afe izói búuai cai facáduamona comeci járitañenafue caimo comuide. Iemona Juzíñamuimo íco cai nabáirizailliriuimo ocuírídicaí. ⁵ Juzíñamui afe comeci járidoñenafue llotímie. Daje izói afémie, cai comeci fírajano caina náretade. Iemona omoi ie canóllena afémiemo jícadícue, illa dígamie jíáimaíairi dájena caimare omoi íllena. Mei Cristo Jesús daí caina dáideza. ⁶ Afe llezica, dájena omoi comécíillena íemo jícadícue, cai Ocuíraíma Jesucristo Moo Juzíñamuina dáuaido omoi caimátaitallena.

Judíoñedinomo Juzíñamui ñúefue jae llujáiga

⁷ Mei daí Cristo caimare cai uáidua izói, afe izói conímana caimare omoi uáidori, Juzíñamuimo ebíredífue nitállena. ⁸ Mei bie cue dáina uai: Cristo judífuai ñue fñuaíbite. Nana Cristo táijina fueñe judífuaimo dúide, cai nanóidígimana dáina uai ñue fuitállena. Afedo Juzíñamui ie méidoñega llogáuaina caimo jino ácatate; mei Juzíñamui afe ie dáina uai jaca jíáífodo méidofínideza. ⁹ Daje izói judíoñedño Juzíñamuimo ióbillena Cristo ana bíniemo bite. Iemona Juzíñamui íaioímo dúecaillari íóbidiaíoi. Juzíñamui Cuegáuai jaiái úcodo daí daide:

Ie jira afe izói judíoñede náiraíai cígiri omo caimátaitícue.
Omo ñúefue cue nitalle rua afémaci cígimo róitícue.

¹⁰ Ie mei jíáínomo Cuegáuai daje izói daide:

Judíoñede náiraíai mai omoi cáimacairi, naa Juzíñamui imáciairi.

¹¹ Nane jíáínomo Cuegáuai daje izói daide:

Naga judíoñede náiraíai, cai Ocuíraíma ióbiri.

Mei afe Juzíñamui jamánomoidímieza, íemo omoi ióbiri.

¹² Mei daje izói Isaías cuete:

Isaí (illaíma David moo) ie méifomo comuídígimamona
jamánomoidíllaíma cómuite.

Afémie nana judíoñedño cígiri illáimate.

Afe comini afémiemo ocuírítiaíoi, daide.

¹³ Juzíñamui caina íemo ocuírítaita. Ie jira íemo omoi ínuamona ñue cáimafue jeire omoi óllena, afémiemo jícadícue, daje izói omoi comeci caimare uái illafue jícadícue. Afe llezica Juzíñamuimo omoi nabáirizaillena birui jabo ocuírídiomoi. Afemona Ñuera Joreño rínododo ñue izire omoi ocuírillena Juzíñamuimo jícadícue. Mai mei daí Juzíñamui ómoína ñue ézicíteza.

¹⁴Cue ámatiai, ñue onódicueza, ñúefuiaina jeire otómoï naa omoi fibítainafuiairi. Daje llezica illa dígamie jíáimacina caimare llófuiana onódiomoi. ¹⁵Mei íadi bie cue cuegábedo, búauillai ómoïmo iere jino uáfodo cueticue, afe uáillaina omoi féitañeillena. Juzíñamui cuemo dúecaillano cuemo jóonenocaigafue jino lloticue. ¹⁶Bie cue táijinafue: Juzíñamui lloga cai jíllloillifue ómoïmo cue llujállena. Afefue ómoïmo lloticue, Juzíñamui íena omoi maméllena, mei judío imáciñediomoiza. Ie mei, Juzíñamui ómoïna caimare uáidoite, mei omoi ja Ñuera Joreño ñue finócaomoiza.

¹⁷Mei daií dama Jesús cue ínuamona, Juzíñamuimo cue táijinafuerei íóbillano caimare iticue. ¹⁸Dama Cristo cuedo finócafuiairi llócaiticue, mei áfedo judíoñedino Juzíñamui uaina jeire otátaticueza. Jáímie táijinafuena jaca jino llócañeiticue. Afe íaioi Juzíñamui uallai jeire ua, cue daina uáillaido jino ñue ícoïmo fuitádicue. Daje izói cue ñue táijinado íaioina ñue jaícina ínotadicue. ¹⁹Afe izói jino cue cíotaga uaido comútaga cíórainina ráamona íemo jíáie onóillena finócafuiairi, íaioina ñue jaícina ínotadicue. Daje izói Ñuera Joreño ite rínodo íaioina ñue jaícina ínotadicue. Bie izói cue ínuamona Jesucristodo cai jíllloillifue llujállena ja ñue ícoïmo fuitádicue. Ua Jerusalémona oni jica nágagobiaido aféfuena llócaidicue. Ua ícoïmo Ilríco éniemo záitajidicue. ²⁰Afe daií, nai jaca Cristo mámecina cacáñedinuiaïmo, afe ñuera cai jíllonafue llócaidicue. Daií oni jicado llócaidicue, jíáima jae llógamo dáanomono nane cue llóñeillena. ²¹Mei íadi Juzíñamui jaiiai Cuegáuai daina izói:

Juzíñamui ífuena nai lloñéganuai afémiena ñue ónoítiaioi.

Daje izói jaca íena cacáñedino nane aféfuena como fdiítiaioi, daide.

Pablo Rómamo jáillena comeci facade

²²Diga icaiño omoi uáiduauillena comeci facáfiredicue, íadi jaca jáinidicue. Mei como ómoïmo cue lloga oni nágagobiaido cue llócaigafuemo záitaiacadicueza; bínidicue. ²³Mei ja birui bígobiaido cue táijicana ja fuitádicueza. Jaiiai diga fimónaiiai omoi diga íacadicue. ²⁴Ja birui Espáñamo cue jáizailla llezica ómoïna méiñuauíbiacadicue. Omoi cígiri cue illa llezica, iere caimare íiticue. Afe mei Espáñamo cue jáiacana llezica, omoi cue canóllena jíitaiticue. ²⁵Mei íadi birui fueñe Jerusalemite ámatiai canolle raa úititue. ²⁶Macedonia énie imaci, naa Acaya énie comíniri, Jerusalemite dúeredino canolle úcube ofítallena maméritiaioi. Afe íaioi ofítaga úcube cuedo Jerusalemite óreitiaioi. ²⁷Afe bie úcube oréllemo ñue comécidiaoioi. Mei jíi, afefue ñue jaícina joide. Uafue benó itímaci afémacimona aillo comeci cáimafuiai íbáñeno itiaioi. Iemona birui Jerusalemite ínotinomo raire íballe ite. Ua judíuaimo ite Jesumo ínotino, íaioïmo ite comeci cáimafuiai, jae judíuainédinomo

dájeze fecádiaioi. Iemona benó Macedóniamo ite ínotino naa Acaya ínotinori, judúuaimo ite ínotinona, afe íbana íaioimo ite úcubedo canóacadiaioi. ²⁸Bie íaioi afémaci cánua mei, afe izói íaioi jónega úcube cue izájille mei, Españamo jáitcúe. Ua omoi uáidocana afénomo jáitcúe. ²⁹Ñue onódicueza, omoi cígiri cue dúcille llezica, nana Cristo uáimona comuide cáimafuiai ómoimo llófuerecúe.

³⁰Amatai, cai Ocuíraima Jesucristo mámeçido izire ómoimo jicádicúe. Daje izói Ñuera Joreño caimo comútaga izíruillafuedo izire ómoimo jicádicúe. Mai, cue diga dájena omoi iri, Juzíñamuimo dájena cai úrillena. Juzíñamui cue canólleza, mai izire omoi jicari. ³¹Dinó Judea éniemo ite íñoñedino cue íaioi llaitáacanamona cue ie zuitálleza izire Juzíñamuimo jicari. Afe llezica bie cue uiga Jesumo ínotino canolle úcube caimare íaioi llíñolleza, daje izói Juzíñamuimo omoi jicari. ³²Bie Juzíñamuimo omoi jicáfireillifuiái ómoimo jónenocaidicúe, Juzíñamui comeci jítaina izói omoi illánomo caimare cue dúcillena. Afe mei omoi cígiri nano áinori cue ílledo cue comeci ñue náireite. ³³Mai, comeci caimare uái illáfueña fecade Juzíñamui omoi ñue nábaiteza. Daiítadeza.

Pablo ie onógamaci uáidote

16 ¹Birui cai Jesumo ínote miríngo Fébena, ómoína caimare uáidotadicúe. Afengo Cencrea jófueimo ite Juzíñamuimo gairídímaci canófiredíngo. ²Cai Ocuíraima mámeçido aféngona caimare omoi llíñori. Mei nana Jesumo ínotino illa dígamie jááimana daí caimare llíñofiredeza. Daje izói nana afengo jitailla raana aféngomo omoi fecari. Afedo aféngona canóredimoiiza, mei afengo jaiai aillo comínina canófiredeza. Iemo jáái daje izói cuena canódeza.

³Iemo Aquílamo ie ai Priscila diga, uai orédicúe; mei afe íaillinoi Cristo Jesús uaimo cue táijicana llezica cuena nabáidiaillinoi.

⁴Jácinomona cue íaillinoi jíllotado íaillinoi illafue jacire fiévide. Aferi afe íaillinoína “Íere figura” daidicúe. Dama cue daí daíñenaza, nana judúuaiñedinomona gairífirede ámatiai daje izói “Íere figura” daidíaiói.

⁵Daje izói Aquila Priscila jofomo gairífirede cai ámatiai uáidori. Daje izói cue izíruiga nabai Epeneto uáidori. Afémie fueñe Acaya éniemona Crísumo ínotímie. ⁶Afe izói ómoído iere táijifiredíngo María omoi uáidori. ⁷Iemo llavéracomo cue llaveina llezica, cue diga llaveca cue nabai Andrónico, Junias diga, daje izói afe íaillinoi omoi uáidori. Cáizie ímie íaillinoi. Jesús orécamacimona mámeçina jica jalleide íaillinoi. Afe íaillinoi nai Crísumo cue íñoñenia, raire uícodo Crísumo ínotiaillinoi.

⁸Afe izói cue izíruiga nabai Amplias uáidori, mei cue izói cai Ocuíraimamo jaináideza. ⁹Iemo Cristo Jesumo cue táijina llezica, cue nabai Urbano uáidori. Daje izói cue izíruiga Estaquísimo uai orédicúe. ¹⁰Afe izói Apeles uáidori, mei diga ícaíño Crísumo ie ínogafueña afémie

jino comínimo ciotateza. Daje izói nana Aristóbulo comini uáidori. ¹¹Cue nairai ímie Herodiómo daje izói uai orédicue, naa cai Ocuíraimamo finote Narciso comíniri. ¹²Daje izói Trifena ie ai Trifosa diga uáidori. Afe íaillinoi cai Ocuíraima táijinamo táijifirediaillinoi. Daje izói cai izíruiga miringo Pérsida uáidori, mei afengo cai Ocuíraima táijinamo táijifiredeza. ¹³Iemo mámecina jica jalleide Ocuíraimamo finotímie Rufo uáidori, naa ie ei diga. Afengo aillo cuena ie izíruillado cue ei izoide. ¹⁴Daje izói Asíncritomo uai orédicue. Iemo Flegonte, íemo Hermas, íemo Patrobas, íemo Hermes, daje izói íaioiri ite ámatiai uáidotícue. ¹⁵Daje izói Filólogo, Julia, Olimpas, Nereo, naa ie miríngooiri uáidori. Iemo nana íaioiri finote ámatiai uáidori.

¹⁶Mai, illa dígamie Crístomo izíruillamona conímána caimare uáidori. Daje izói benó Juzíñamuimo gairíracuai imaci ómoimo uailai orédiaioi.

¹⁷Amatiai, bifue jeire omoi óllena izire jicádicue. Conímáina éoitadinomona abí omoi rairuiri. Afémaci jíáimana fiene ícítailla izói finódiaioi, omoi ñue finogafue féitallena. Baimáci jíáimana énenoruitaitiaioi. Bie íaioi lloga uai, naui omoi cue llófuiafuena uáitaacadeza. Afémacimona oni jicado omoi iri. ¹⁸Afe izóidino cai Ocuíraimo comeci jítaina izói íñédiaioi. Dani íaioi comeci gáinanomo táijidiaioi. Afe llezica íaioimo ite caimare ebírerie urilla uaido, comécina nífuenidinona jífuetiaioi. ¹⁹Nana jíáie comini Juzíñamui uai jeire omoi úana fidídiaioi. Iemona áferi íóbidicue. Iemo ñúefue dibénedo iere baitádimacina omoi íllena jítáidicue. Mei jíáifodo fiénidífue fínua dibénedo nífuenide onóñedimacina omoi íllena jítáidicue. ²⁰Mei onódicaiza, comeci caimare uái illafue llote Juzíñamui Taife uaina anáfenoteza, omoi ie áifedoñeillena. Mei cai Ocuíraima Jesucristo ómoína ñue éziciiteza.

²¹Cue diga táijiacade nabai Timoteo ómoimo uai orede. Daje izói cai nairai ímíiai Lucio, íemo Jasón, íemo Sosípater diga ómoimo uailai orédiaioi.

²²Pablo ocuica rabe cúeraimadicue; cue mámecí Tercio. Daje izói Jesumo cue jaináinamona uai ómoimo orédicue.

²³Benó ite Gayo ómoína uáidote. Birui afémie jofomo iticue. Daje izói nana Juzíñamuimo gairíacadinomo íaioi dúciillena, afécona nano íanori íaioimo fiende. Daje izói cai jófuemo ite úcubemo táijidímie Erasto, uai ómoimo orede. Iemo cai ama Cúartona mámeciredímie uai ómoimo orede.

²⁴Mei cai Ocuíraima nana ómoína ñue íllena éziciiteza. Daiítadeza.

Iiraicaiño Juzíñamuimo caimátaillafue Pablo úrite

²⁵Juzíñamuimo mai cai caimátailli, mei afémie omoi finogafuena iere izire ínotaredeza. Cue ómoimo jino lloga cai jílluille uai daií dáideza.

Daje izói Jesucrístodo omoi cue llófuiafue daií dáideza. Juzíñamui jaiái ie comécido mamérilla izói, ja birui judíoñedino comécina ñue náiretade. Ua, bínie nai cómuñenia, bífuena jica ia daií comécido mamede. Ja diga fimona jaide íadi, aféfuena báiñino íteza, nai jino comínimo uáfodo llóñega. ²⁶Mei íadi ja birui Juzíñamui uai llócaidino cáiena fieca Cuegáuaido, afefue jae jino denoca. Bífue ziiño Juzíñamui ocuilla izói caimo íficaide. Bie fueñe báiñino Juzíñamui comécido mamérillafue, ja birui nana náiraiaimo jino cíotaga, aféfuena íaioí onóillena. Daje izói afefue jae jino íaioimo cíotaga, comécido íinota afe uaimo ñue jeire íaioí óllena.

²⁷¡Daade jamánomo baitade Juzíñamuimo ebírede ñúfuiaí nítaitaiza! ¡Daií afémiemo Jesucrístodo ziiñona jaca ninomo llóiticaiza! Mei daiítadeza; jae ñie.